


Si Aji Donda Hatalutan dan Pangulubalang



Asrenius Lumbantobing

8

Direktorat
Kebudayaan

46

Departemen Pendidikan dan Kebudayaan



SI AJI DONDA HATAHUTAN

dan

PANGULUBALANG

8992296

ASR

S

PPS/Bt/5



SI AJI DONDA HATAHUTAN dan PANGULUBALANG

oleh

Asrenius Lumbantobing

Departemen Pendidikan dan Kebudayaan
Proyek Penerbitan Buku Bacaan dan Sastra
Indonesia dan Daerah
Jakarta 1978

KATA PENGANTAR

Pembangunan di bidang kebudayaan adalah bagian integral dari pembangunan Nasional. Pembangunan di bidang kebudayaan tidak dapat melepaskan diri dari pemikiran dan usaha pengembangan dalam bidang sastra. Karya sastra merupakan manifestasi kehidupan jiwa bangsa dari abad ke abad dan akan menjadi peninggalan kebudayaan yang sangat tinggi nilainya. Karena itu karya sastra perlu digali dan digarap supaya dapat diresapi dan dinikmati isinya. Karya sastra memberikan khasanah sejarah ilmu pengetahuan yang beraneka macam ragamnya. Hasil penggalian dan penggarapan karya sastra akan memberikan rasa kepuasan rohani dan kecintaan pada kebudayaan sendiri yang selanjutnya juga akan merupakan alat yang tangguh untuk membendung arus masuknya pengaruh kebudayaan asing yang tidak sesuai dengan kepribadian dan kepentingan pembangunan bangsa Indonesia.

Penghayatan karya sastra akan memberi kesimpulan antara kemajuan ilmu pengetahuan dan teknologi modern di satu pihak dengan pembangunan jiwa di lain pihak. Kedua hal ini sampai masa kini masih dirasa belum dapat saling isi-mengisi sedangkan keseimbangan atau keselarasan antara kedua masalah tersebut besar sekali peranannya bagi pembangunan dan pembinaan lahir dan batin. Melalui sastra diperoleh nilai-nilai, tatahidup dan sarana kebudayaan sebagai sarana komunikasi masa lalu, kini, dan masa depan.

Sebagai peminat dan pemakai bahasa dan sastra Daerah Tapanuli, baik di sekolah maupun dalam masyarakat pada umumnya sudah lama dirasakan kekurangan akan bahan bacaan atau penunjang pengajaran, maka Proyek Penerbitan Buku Bacaan, Sastra Indonesia dan Daerah bekerjasama dengan P.N. Balai Pustaka, sebagai penerbit buku-buku sastra yang dikenal sebelum perang

Dunia kedua, mencoba memenuhi kekurangan tersebut dengan menerbitkan kembali buku-buku sastra dari daerah itu, di samping itu juga diterbitkan buku berbahasa Batak yang berasal dari milik perorangan. Dalam pada itu usaha penggalian berlangsung terus semoga dapat diterbitkan dan diharapkan pula mendapat tanggapan baik dari para peminat.

Dengan terbitan ini diharapkan bahwa kekayaan sastra daerah yang sudah hampir dilupakan dapat dikenal kembali serta dapat menambah pengertian dan apresiasi terhadapnya.

Jakarta, 1978

Proyek Penerbitan Buku Bacaan dan Sastra
Indonesia dan Daerah

RINGKASAN

Tersebutlah, sepasang suami-istri yang sangat saling mencintai dan berbahagia. Kebahagiaan mereka berkurang, karena mereka belum juga mendapat anak biarpun mereka sudah lama kawin.

Kedua suami-istri itu sepakat untuk pergi ke dukun. Dukun menganjurkan supaya suaminya yang bernama Pambarbar na Sumurung (bahasa Indonesia berarti Pemahat Ulung) mengganti patung yang ada di rumahnya dengan yang lebih baik. Ia dianjurkan untuk mencari kayu yang baik ke dalam hutan.

Sesudah sehari-hari berjalan, barulah ia bertemu dengan kayu yang bagus dan cocok. Ia pun mulai mengukirnya menjadi seorang perempuan cantik. Tetapi sesudah selesai, ia tidak dapat mengangkat patung itu, untuk dibawa pulang. Biarpun ia minta bantuan banyak orang, tidak juga bisa digerakkan dan akhirnya terpaksa ditinggalkannya dengan kecewa.

Tidak berapa lama sesudah itu, lewat dua orang pedagang, seorang pedagang kain dan seorang pedagang emas. Melihat patung yang bagus itu, pedagang kain memasang pakaian lengkap dan pedagang emas memakaikan perhiasan lengkap. Waktu akan pulang, mereka ingin mengambil pakaian itu kembali tetapi tidak bisa, karena sudah melekat pada badan patung. Akhirnya mereka pulang dengan bersedih hati.

Tersiarlah khabar tentang patung yang bagus itu ke seluruh negeri. Seorang dukun ulung datang dengan obat penawar, yang dapat menghidupkan patung itu dan diberi nama Si Boru Jongjong Anian. Sesudah hidup patung itu berubah menjadi seorang gadis cantik yang tak ada bandingannya. Dukun itu ingin mengawininya, tetapi gadis cantik itu mengatakan dukun itu adalah ayahnya. Dukun itu mengangkatnya jadi anak dan dengan upacara dibawa pulang serta dibangun untuknya sebuah rumah tempat bertenun.

Tak seorang pun pemuda dapat mendekati tempatnya bertenun itu karena dikawal oleh harimau, anjing, babi dan sebagainya, sedangkan tangga rumahnya dibuat dari pisau-pisau tajam.

Akhirnya ia jatuh cinta pada seorang pemuda gagah dan banyak ilmunya yang dapat mengalahkan binatang-binatang pengawalnya serta membuat pisau-pisau di tangga rumahnya tidak berdaya. Dengan susah payah, setelah mengalami cobaan dan ujian yang berat-berat pemuda itu dapat menikahinya.

Setelah gadis itu kawin, terjadi perkelahian antara pematung, saudagar dan dukun. Perkelahian berakhir setelah mereka diangkat sebagai paman gadis.

Si Boru Jongjong Anian dan suaminya mendapat anak kembar dua, seorang perempuan diberi nama Si Boru Sopak Panaluan dan seorang laki-laki diberi nama Si Aji Donda Hatahutan. Kedua anak itu cantik dan gagah dan keduanya sangat menyayangi satu sama lain. Sesudah mereka dewasa, mereka saling jatuh cinta dan mereka mengadakan hubungan sebagai suami-istri, biarpun sangat dihalang-halangi oleh kedua orang tuanya. Pemuda tidak mau kawin dengan gadis lain dan si gadis tidak mau kawin dengan pemuda lain. Orang tuanya, sejak dari waktu mereka masih kecil berusaha keras memisah mereka, tetapi tidak berhasil.

Pada suatu hari pemuda itu pergi ke hutan dan adiknya mengikutinya. Mereka naik sebuah pohon untuk melepaskan rindu mereka, tetapi keduanya melekat pada pohon itu dan menjadi kayu. Beberapa orang dukun mencoba melepaskan mereka, tetapi malahan dukun-dukun itu turut melekat pada pohon.

Si Boru Sopak Panaluan menangis kesakitan dan terus-menerus minta tolong tetapi segala usaha orang tuanya tidak berhasil melepaskan mereka. Anak perempuan itu meminta kepada ayahnya supaya ia dibuat menjadi tongkat yang dapat dipakai ayahnya. Sebagai tongkat ia dapat membantu ayahnya menahan badai, melawan musuh, mengobati penyakit, menolak bala dsb.

Ia dengan orang-orang lain yang menjadi kayu itu dibuat menjadi tongkat serta kayu tempat mereka melekat itu diangkat ke halaman rumah orang tuanya. Bila ada upacara atau peristiwa penting, tongkat-tongkat itu dikeluarkan dari rumah dan dibawa

ke bawah pohon. Sejak itu tongkat yang dibuat dari Si Boru Sopak Panuluan itu dianggap sangat keramat, sehingga obat-obatan dsb akan lebih ampuh bila didahului dengan upacara permohonan bantuan dari tongkat itu.

Juga pangulubalang akan sangat berhasil mengalahkan ataupun mengacaukan musuh bila telah diadakan permohonan bantuan terlebih dahulu pada tongkat tadi.

SI AJI DONDA HATAHUTAN.

Gantung ma na sabitis, mambal na sabotohon, hata ni turiturian, pagodang-godang dohonon. Asa adong ma na saingan, sahalak na morgoar Pambarbar na Sumurung, pande na lumobi, nunga lelung nasida dung morbagas, laos so hea do tubuan poso-poso jolmana. Dung i sian arsak ni rohana, didok ma tu jolmana i, "Oe ale inang, boru ni rajanami, porsonduk bolon! Dia nama pangalahona, taringot tu portondionta on? Jumolo pinggol tubu, joloan tanduk magodang; sude dongantorbangta tubu, nunga mordua goar. Beha ma hita on, songon hunik na halaosan, songon sibungkuk tanggurung, na so olo morhasoan. Ua taalapi ma datu, asa disurirang jolo manang na songon dia do portondionta."

Dung i didok jolmana i ma mangalusi: "Ba molo i ma, nimmu, ale rajanami, sianak ni namboru, ba taalapi; ai ahu pe, tung mansai marsak do rohangku sumarison na soada i anakkonta", ninna.

Jadi saut ma dialapi nasida datu i, dialamat ma portondionnasida, didok ma, "Iale amang, Pambarbar na Sumurung! Sorangan ni laklak ma ho, sorangan ni singkoru; sorangan ni anak ma ho, sorangan ni boru. Alai anggo on dohononku di ho: ingkon singkatanmu do naga-naga ni rumami, ai i do na manginsombul tu ho; asal ma disingkati ho i, naung sorangan ni anak dohot boru ma ho", ninna.

Dung songon i hata ni datu i, didok Pambarbar na Sumurung ma tu jolmana, "Ale boru ni datulang, duda dainang ma bohal, asa laho ahu tu tombak masihau, asa tasingkati naga-naga ni rumanta on; unang so i do sibahen na gabe", ninna.

Dung i ninna jolmana i ma, "Olo da, amang! Asal ma tutu adong panggabean di hita; hupagodang pe hududa anggo balan-jom tu harangan."

Jus ma ninna solu, sar ninna tahut-ahu; pur ma ninna barita, sar ma alu-alu, morhobas porlanja, portiga-tiga torus, pangal-lung na ummetek, siusung bulu sambangkir, na modom di lang-lang, na mangan di bulung sihupi, siganjang tali hallungan, si-jompok tali panggongan, sitadingkon naung jumpang, mangalului asa dapotan. Adong ma didok barita, hau di harangan, na margoar hau jongjong anian, hau tibal tudosan, sadopa do ginjangna, na sajolma do bolonna. Ia ingananna, i ma di harangan rumbun rea, di tombak na ngolngolan, di hatubuan ni pongki na ngirngir-an, di talun-talun ni begu, na so hea niumbolan ni jolma; i ma di dolok nanggairi, di dolok nanggaraja, tondong ni aek na mor-halisung tu aek na morhatobung, na tinogu ni palilung, umbahen na olo halak tarjolung.

Ia mangullus ma alogo dumugur ma bulungna, sumebe ma dangkana. Ia jomba tu habinsaran, tung na soada do anina; ia jomba tu hasundutan, tung na so adong do suman ni hau i luluan, dibahen ulina, dibahen dengganana.

Ia niaithon tu siamun, songon gondang sombaon ma pang-kulingna; ia tu hambirang niaithon, songon gondang dalam soa-rana. Songon lada ma antong, songon singkoru, songon na sada, songon na tolu, diida bao porlanja, portiga-tiga torus, na laho tu onan sitahuru, tu onan tigaraja; mula ni gambir tu munsung, mula ni demban tu baba; di si do pangaritan ni tarugi panampulan ni siala, pangaluluan di na uli, sipatuk na soada. Sai dibereng porlanja i ma hau jongjong anian i, hau tibal tudosan, dung i di-dok ma tu donganna: "Inang da ba, inang, asing ni hau on! Gan-jang ma dalam nidalanan, godang ma na niida; anggo tung songon hau on, inda tung hea dope binereng", ninna, "ai alogo do mangul-lus, sumebe-sebe do dangkana, dumugur-dugur do bulungna; aut tung sura ganaon ibana, tung na so adong do anina, tung na soada do tudosanna."

Dung songon i, hundul ma ibana, dirahut ma hallunganna, laos mulak ma ibana tu hutana. Ia dung sahat ibana ro di huta, dipaboa ma tu na niolina: "Barita ni langgungung solot di bulung

bira; barita ni hau jongjong anian, hau tibal tudosan, na soada situlukna.”

Dung i sar ma barita, pur alu-alu, habegean ma i tu Pambarbar na Sumurung, ditompi ma bohalna, laho ma ibana tu tombak longo-longo, tu harangan rumbun rea, tu hatubuan ni pongki na ngirngiran, mandapothon hau jongjong anian, hau tibal tudosan, asa i buatonna bahen naga-naga ni rumana.

Ia dung sahat ibana ro di harangan i, diida ma tutu hau i, na soada anina, na so adong tudosanna. Dung i dibuat ma tangkena ditallik ma hau i, alai ndang olo bil; ditallik diulakkon, alai laos so olo do maluhit. Dung i tangis ma Pambarbar na Sumurung, ninna ma: ”Oe, pangidoanmi da, tondingku lapung; por-dangkami da siala! Sapot ni nipimi da tondingku lapung, sibaran lapa-lapa!”

Ia dung songon i, mulak ma Pambarbar na Sumurung, muli ma ibana, dipasingkop ma ambu-ambuan, asa adong pelehononna tu boraspati ni sombaon, asa anggiat olo hau jongjong anian i tabaonna. Dung singkop saluhutna, diulahi ma laho tu tombak na limuton, mandapothon hau tibal tudosan. Ditogihon ma hatobanna mangalanja balanjona, diboan ma tangkena dohot godokna. Borhat ma Pambarbar na Sumurung, panggana na lumobi, mordalan ma nasida sahat tu hau jongjong anian, hau tibal tudosan. Dipeakkon ma ambu-ambuan i, morsantabi ma ibana tu ompuna boraspati ni tano, hinaojahan, hinaondolan, dung i ditallik ma hau i, ndang olo bil; sai ditallik, laos so olo belut.

”Inang da ba, inang! Nunga piu on songon tali, putor on songon langkitang”, ninna bao Pambarbar na Sumurung, panggana na lumobi, sibahen na marigung, sibahen na mortangan, sibahen na morulu, sibahen na morpat; bao pambarbar na sumurung, pambarbar panggotui, pambarbar pande ruma, pangarahut pande sopo, panjungkit pande jugia, pangarahut pande unggas, porgodok sihurpas boru-boru, sahali do ditallikkon di bulan sipahaua, portangke siparunung-unung, porraut na sumolot-solot, solot di bulung bira, sahali pe diarithon manang tu aha, ndada na adong anina.

Ia dung ma songon i, sai jut roha ni bao Pambarbar na Sumurung, panggana na lumobi, manallik hau tibal tudosan, matua

so olo bil, manaili ma ibana tu ginjang, gabe dibege ma hulis-hulis lali di harangan i, songon on didok: "Hulis, hulis! Sambilu bulung tobu ma bahen seat-seatna, ansimun na mortagan bahen pasak-pasakna, asa boi marumpak bahenonmu hau jongjong anian, hau tibal tudosan!" ninna.

Dung dibege Pambarbar na Sumurung na nidok ni lali i, didangguri ma tu ginjang, huhut ma didok: "Haru tangke do hubahen, ale lali, so dihilala, ba lam sambilu bulung tobu ma?!" ninna.

Alai didok lali i ma mangalusi, "Ba molo so oloanmu na hudok i, roham do; ai adong do ruma ijuk, panoloti do soada; adong do sipaingot, pangoloim do na soada; hudok hatangki, hape sogo roham, ba idaonmu do muse pandapotanna."

Ia dung laho lali i, morpingkir ma Pambarbar na Sumurung, didok ma di bagasan rohana, "Nioloan ma jolo hatana i, anggiat tutu na nidokna." Dung i laho ma ibana mambuat bulung tobu, diirishon ma i tu hau jongjong anian, pintor puas ma gotana songon mudar in jolma, dung i morumpak ma hau i, dumugur ma bulungna, lumapat ma dangkana, humuntal ma langgung-gung, mangkuling ma sidomdom. Ia dung marumpak hau i, dibarbar ma muse, dung i digana. Ditailihon ma antong, na so adong do anina, na so ada tudosanna. Hau na ginjang i ma tu hau na bolon on; bulung ni sungkit i ma na hupopohon on; tung na so tuk do malo ni rohangki patorangkon pande ni Pambarbar na Sumurung, panggana pande gorga on.

Ia dung ma sidung digana, didokkon ma hatobanna i mangu-sung, alai ndang boi hindatonna; ro pe Pambarbar na Sumurung mangurupi, nanggo tung humosing na ginana i, soada. Ia dung songon inon loja nasida, laos so boi hau i paeretonna, tangis ma Pambarbar na Sumurung, digalmit ma hurumna, digotil lambiakna, angkadekdek ma iluna, ditangkupi hambirangna.

Bulung ni gaol pinariga-riga,
Ia andorang so saut digana,
Sai naeng na hurang gira,
Ia dung saut digana,
Nunga sumolsol bagina.

Ia dung sai tangis Pambarbar na Sumurung, panggana na lumobi, hulis-hulis ma muse lali di ginjang, didok ma: "Unang ho sai tangis, ale Pambarbar na Sumurung, ai sai na morbarita do ho di pagian ni ari", ninna.

Dung i mulak ma nasida tu tonga ni jabuna, ditinggangkon Pambarbar na Sumurung ma ibana, so haru tu talaga, so haru tu halangulu, sian dele ni rohana. Dung i didok jolmana i ma: "Boa-sa tangis ho, anak ni naboru, anak ni raja bolon?"

Alai didok ma mangalusi: "Ba aha ma so tangis ahu, ale boru ni datulang, ai nunga songon jarojak na taruntul ahu, songon ansuan na tarbatu, songon gala-gala mormutik, na soratan di bonana, ia hugana hau jongjong anian, na soada tudosama; hape ia naeng usungonnami, so boi paereton, nda na ripe di ngalutna ma iba, so dohot nampunasa?!"

Dung i didok jolmana i ma: "Anggo i do hape, unang pola marsak ho, hahuaon; ndada sai sude gogo na pinanganhon; unang pola sai marsak ho!" ninna. Jadi sonang ma rohana umbege hata ni jolmana i.

Ia dung ma inon, lelung ma di porlelengan, lalap ma di porlalapan, laho ma halak Portiga-tiga Torus, borhat ma portiga-tiga ulos, mamolus ma nasida di tombak na limuton, di harangan longo-longo, sahat ma nasida tu lambung ni hau jongjong anian hau tibal tudosan, naung ginana ni pambarbar na sumurung, panggana na utusan, gabe longang ma nasida mornida dengganna, ai tung na so adong do anina, soada tudosanna; dung i laos maradian ma nasida pabereng-berengkon, di dolok nanggaraja, portungkoan ni na hundul, parandianan ni na loja, manotnotihon ganagaan, na so moranian, na so mortudosan i. Dung i didok nasida be ma: "Inang da ba, inang, ise ma ulaning manggana on! Beha muse ulaning ulina, aut binahen paheanna. Ua tabahen ma, ale dongan, ulosta on paheonna, asa taida jolo dengganna!" ninna deba halak sian partiga-tiga ulos i. Alai ro ma deba mandok: "Aha ma na pinaaha-aha di si, rohana ma di si, ua atik manang aha i, so pina-boto-boto i. Beta ma hita, ai nunga tingkos ari, naeng hita tu onan", ninna.

Alai ro ma na sada mangalusi, i ma na morgoar Si Gabagobu, didok ma: "Aha ianggo ho! Sai luhut do huroha ari na pinang-

gulahon di roham", ninna. Dung i dibuat ma ulos tiga-tigana i, dialithon ma i tu gana-ganaan i, ai nunga jongjong hian i didapot nasida. Ia dung dialithon abitna i, pintor subur ma antong rupana, ndada adong be situlukna, tung na soada do tudosanna, lobi do sadampang boni sinondang ni bohina. Dung i didok Si Gabagobu ma muse: "Dagoi amang, dengganna i!" Dibahen muse ma mas tu pinggolna, disangkothon muse dohot ulang-aling tiga-tigana hian. Dipahusor gana-ganaan i, humusor ma antong; ia tu si diaithon, tu si do mangoloi; hape ia na manggana i uju i paerethon, humurtik pe soada.

Ia dung ma songon i, dibahen muse ma haen sabesabena, morgondang baba ma nasida, dipangurdot-urdothon ma gana-ganaan, tu siamun diaithon, tu si do mangoloi, tu hambirang dieolhon, tu, si do so manjua, tung mangolo-oloi do songon na mangolu, tung mansai las do rohanasida paida-idahonsa.

Alai dung bot ari, didok nasida ma:

"Beha, ale dongan sanga dope hita laho tu onan?" Alai didok na deba ma mangalusi: "Indang sanga be hita laho tu onan, ai nunga bot ari, hutanta na sai dao. Mulak ma hita tu huta!" ninna.

Alai di na laho mulak i nasida, disandehon nasida ma gana-ganaan i, naeng ma tanggalan nasida sude pahean na binahenasida i, hape nunga lohot, indang boi be buaton; raut pe dibahen so boi; gogo pe ditoltol laos so boi. Dung i didok nasida be ma: "Nunga piukon songon tali, nunga putor on songon langkitang; nunga dipupusi na so marroha hita, dipaoto-oto na so mangolu. Tinunjang panggaruan, angkabola panggonggonan, nunga gabe anian hita on jala gabe tudosan; rupa dohot ma angka anakonta gabe tu paradopan, ai nunga suda pangkalta dipogo gana-ganaan on", ninna nasida be.

Dung i sai masisolsolan ma nasida mandok: "Ia so nioloan hata ni dongan, naeng oloan; ba ia nioloan, hape hamagoan." Ia dung so boi be buatonnasida tiga-tiganasida i sian gana-ganaan i, ditadingkon ma songon i, laho ma nasida muli, tangis be ma nasida morsuap-suap iluna.

Ia dung sahat Si Gabagobu tu jabuna, ditinggangkon ma ibana, so haru tu talaga, so haru tu halangulu, dibahen dele ni

rohana. Dung i manungkun ma jolmana, didok ma: "Aha huroha na masa, dia na muba, umbahen na songon i ho, ale anak ni rajanami?" ninna. Adong huboto be, ale inang; rupa mangadop na ma hita dohot angka anakkonta i", ninna ibana mangalusi.

Dung i didok jolmana i ma muse: "Ba, tung paboa damang jolo alana, manang dia alana umbahen na didok ho songon i!" ninna. Dung i dipaboa Si Gabagobu ma pangalahona, na binahenna i, ulos tiga-tigana dohot mas dohot ulang-aling i tu gana-ganaan na niida i, hape so boi be muse buatonna.

Dung i ninna jolmana i ma: "Inang da ba, inang, tung pupusan ni na mate ma hape na mangolu! Alai hahuaon; unang pola mamarsakku ho, sai tubu ma singkat ni i di hita, ditumpak ompunta Debata." Jadi sumonang ma roha ni Si Gabagobu umbege pangapuli ni na niolina i. Ia dung sidung nasida na mangkatai i, mortatahuak na manuk manjojoti paboa torang ni ari.

Ia jus ma ninna hole, sar ma ninna tahu-tahu pur ma ninna barita, sar ma alu-alu tu Datu na Sumurung, portaoar na lumobi, datu pangubung, siubung hosa loja, sipangolu naung mate. Ia dung sahat tu ibana barita, taringot tu gana-ganaan, hau jongjong anian, hau tibal tudosan, disuru ma hatobanna mamboan ululana, diusung ma antong taoar pangabang-abang, taoar pangubung-ubung, sipangolu naung mate, siparata naung busuk.

Mordalan ma nasida mangadangi gana-ganaan, hau jongjong anian, hau tibal tudosan, jumpang nasida ma antong di tombak na ngolngolan, di harangan na limuton, hatubuan ni pongki na ngirngiran. Didaishon ma taorna i tu pamangan ni gana-ganaan i, gabe boi ma mangkuling, alai indang boi dope mornida. Didaishon ma taor i muse tu matana, gabe mornida ma huhul, alai indang boi dope morbinege. Didaishon muse ma taoar i tu pinggolna, gabe morbinege ma antong, alai indang dope morporniangoan. Songon i ma sai dipandaishon taorna i, gabe mangolu ma songon jolma hian. Tung na so moranian do, tung soada mortuduson; mansai longang ma Portaoar na Sumurung, mida hinadengganna, nunga naeng i di rohana bahenonna siadopanna. Songon lada ma antong songon singkoru, songon na sada ma idaon, songon na tolu, pangeol ni gontingna songon dengke na mangolu; songon pusuk ni hatunggal, na so halinggoman, songon

manuk sabur bintang, songon na sumillam borngin, disondang na di pudina, dipatiur na di jolona, dibahen hinaulina, dibahen hina-dengganna; naeng ma i gogoan ni Portaoar na Sumurung bahen siadopanna. Pitu panggaruan, ualu panggongonan, ianggo portaoar na sumurung, nunga tung mansai longang.

Dung i mangkuling ma gana-ganaan i, hau jongjong anian, hau tibal tudosan, naung gabe jolma na mangolu, didok ma: "So tung manuan bulu ho, amang, di dalan-dalan ni babi; unang ho mangulahon na so uhum, mambahen na so jadi! Tongka songon i bahenonmu tu ahu, ai damang do ho, borum do ahu. Ahu ma Si Boru Jongjong Anian si Boru Tibal Tudosan Hau Jadi-jadian Hau Jadi Mamora", ninna.

Alai didok Portaoar na Sumurung i ma mangalusi: "Manang beha pe didok ho, ingkon saut do ho di ahu", ninna. "Palias hatam, tongka songon i, ai damang do ho, borum do ahu", ninna Si Boru Jongjong Anian mangalusi. Dung i dipangke Datu na Sumurung, portaoar na lumobi ma nasa ula-ulaanna, dipatuat ma dohot dorma sitogu losung tu Si Boru Tibal Tudosan, hape indang belut, ai indada dumatu ibana sian i. Dung i didok Si Boru Jongjong Anian muse: "Boti ma i amang; unang be sai tuntun roham dompak ahu, indang aha laba ni i, ai borum do ahu."

Dung i didok Portaoar na Sumurung ma mangalusi: "Ba molo songon i ma, nimmu, ale inang, ba na uli! Balintang ma pagabe, tumandakkon sitadoan, arinta ma manggabe, hita masipaolo-oloan, tumpahon ni ompunta sombaon dohot porsumangotan. Ba molo borungku ma ho, ba amam ma ahu", ninna.

Dung i didok Si Boru Tibal Tudosan: "I ma tutu, ale amang, bangun-bangun na bara, tabo paura-uraon, molo nunga nidok hata, tongka pauba-ubaon; hori ihot ni doton, hata do siingoton!" ninna.

Dung i didok datu na sumurung i ma, portaoar na lumobi: "Ba molo songon i, beta dainang ma tu huta!" ninna.

Alai didok Si Boru Tibal Tudosan ma mangalusi: "Ia burjum do naeng manogihon ahu tu huta, ingkon jolo paluonmu do gondang sabangunan, ingkon jolo alapanmu do pangulu bolon, porsanggul baringin manomu-nomu ahu; dung i ingkon doho-

nonmu do ahu borum, na tubu pandatuan", ninna. Dung i dioloi ma sude hata ni boruna i.

Dung i mordalan ma nasida, digondangi ma tutu, sahat ma tu huta. Jadi didok Si Boru Jongjong Anian Si Boru Tibal Tudosan ma: "Molo manortor ahu, ale amang, ingkon jolo rimbe-rimbean do para-para", ninna.

Alai didok amana i ma: "Indang hea masa songon i, indang dung rimbean para-para, ai naeng do tangkas panortor idaon ni paninondur", ninna.

"Anggo so songon i do, ale amang indang manortor ahu", ninna Si Boru Tibal Tudosan muse.

"Unang so i do sibahen na manortor boru ni raja i, ba aha ia nirimberimbean para-para i", ninna angka paninondur i. Dung i saut ma dirimbe-rimbei nasida para-para i.

Manortor ma antong Si Boru Jongjong Anian Si Boru Tibal Tudosan, tung na so moranian do, soada tudosanna, pangurdot ni dagingna, pandauk ni tanganna.

Longang ma sude paninondur i, patupeut ma gual-gual sian tangan ni porgonsi, angkadekdek ma dohot diingot porsarune be mangurngat sarunena. Ia dung songon i, didok Boru Tibal Tudosan ma: "Inang, sapot ni nipingki, soro ni aringkon; apala tung manortor ahu sahali, nunga masa na so uhum on! Inang da ba inang, angkadekdek gual-gual, mordabuan angka ogung. Songon i ma hape hangalan ni Si Boru Jongjong Anian Si Boru Tibal Tudosan", ninna. Dung i sae ma gondang i, tiur ma siulubalang ari.

Ia dung ma i, dipauli Datu na Sumurung, portaoar na lumobi ma pantangan, portonunau ni boruna i, pantangan andang-andang, pantangan undung-undung, pantangan onding-onding, na rumahut-rahut ibana, na pinijor-pijor holing, songon rahut ni ogung oloan, portonunan ni Si Boru Jongjong Anian Si Boru Tibal Tudosan, Mortonun ma ibana antong di si. Ia soara ni baligana i, songon sidomdom borngin, songon sigomtam arian, songon na moro-lop-olop, songon na moria-ia, songon na mangkatai, songon na manjou-jou di situan raja doli. Umbege i antong angka situan raja doli-doli, morudur-udur ma nasida, morumbol-umbol ro tu lambung pantanganna i, angka anak nina sangap, tubu ni na mau-libulung, angka porpahean no uli jala portali-tali horung-korung.

Alai atik pe songon i torop angka siraja ni doli-doli ro tu lambung pantangan ni Si Boru Jongjong Anian Si Boru Tibal Tudosan, inda tung adong barani, na hum roha mandok hata sangkambaba tu ibana. Masiboan utina pe antong angka doli-doli na ro i, masipatuduhon lehetna, tung na so adong do na sininta ni roha Si Boru Jongjong Anian, tung na soada do sian i na tinodo ni simalolongna.

Suak-suak ni dingding binahen sulu-sulu ni api, inda tung adong patudoson songon Si Boru Jongjong Anian Si Boru Tibal Tudosan di siulubalang ari.

Ia morbarita ma porbarita, mangalu-alu ma pangalu-alu, sar ma barita ni Si Boru Jongjong Anian tu hapoltahan ni bulan, tu habinsaran ni mata ni ari, dibege Nai Datu Tantan Debata Guru Satia Bulan, laho, tu pordatuan, Guru Satia Raja, ia laho tu porrajaan, na morgoar Si Aji Pastimalaning ia laho tu pordolian, na morgoar Si Tuan Purbalaning, ia laho tu pangulaan, na morgoar Si Songkir Ulubalang, ia laho tu habeguon, i ma halak Guru Satia Raja, naung tangkas di undang-undang, naung tasak di hatahata, naung singkop di porguruan, naung tang di porbinotoanna. Dibuat ma imbulu ni horbo dibahen tu garung-garung: dibuat imbulu ni hoda, dibahen tu garung-garung, dibuat imbulu ni lombu, dibahen tu garung-garung; dipapungu ma i sudena.

Dung i borhat ma ibana, diboan ma tungkotna, tungkot maradang adang, tungkot morudung-udung, tungkot laho mordalan, siarudan laho hundul. Mordalan ma ibana sahat tu huta ni Datu na Sumurung, portaoar na lumobi, dibege ma soara ni baliga ni Si Boru Jongjong Anian Si Boru Tibal Tudusan, na so moranian, na so mortudosan. Di na laho bongot ibana tu huta, diida ma di baba harbangan, gana-gana sipitu ulu, sipitu hali mamereng, ia sahali ibana mamereng, sahalak mate bahenonna, ia pitu hali ibana mamereng, pitu halak mate jonggoronna, asa indada na tar-taon panailina, ai lobi do songon pangonai ni porhas panjonggorna. Dung i dituju Guru Satia Bulan ma gana-gana i, gabe mordekdehan ma matana.

Dung i manaili ma Si Boru Jongjong Anian, diida ma naung sega gana-gana i dituju baoa i, gabe didok ma tu amana: "Beha ma i, ale amang, datu na sumurung, hehe ma ho, ai nunga lengse

gana-ganaan na di harbangan an, dibahen baoa, na so tinanda an!" ninna.

Alai didok Pambarbar na Sumurung ma mangalusi, "Ba ise ma na hum, tung ise ma barani mandonohi gana-ganaanta i, anggo so na naeng mago do ibana", ninna.

Dung i didok si Boru Jongjong Anian ma muse, "Rohangki nian, ale amang; alai beha ma bahenon, nunga angkadabu matana dibahen baoa na so tinanda rupa, na so binoto goar", ninna.

Didok Datu na Sumurung ma muse, "Ai burjum do i, ale inang, tutu do i na nidokmi?" ninna.

Dung i didok Si Boru Tibal Tudosan ma muse: "Haru silu ma amang, haru ida ma ne!" ninna.

"Beha ma i, inang, Boru Jongjong Anian, ua tung malua ibana sian harbangan, beha ma tu alaman, ai di si do biang sangsing dohot babiat sibolang dohot gompul morunung-unung, dohot nasa ragam ni pandoit, bisa na so hodonohan", ninna Datu na Sumurung, portaor na lumobi.

"Atik pe songon i, ale amang", ninna Si Boru Jongjong Anian Si Boru Tibal Tudosan, "indang dianggalhon i huroha".

Dung i dipasang Datu na Sumurung, portaoar na lumobi ma sude ula-ulana, luhut boto-botoanna, alai nang pe dipasang i luhutna, so do, indang manjadi.

Mordalan ma antong Guru Satia Bulan, sahat ma ibana tu lambung pantangan, portonunan ni Si Boru Jongjong Anian i, gabe disungkun ma ibana, "Ise do hamu, ale anak ni rajanami, na ro sian dia do hamu?" ninna.

Dung i ninna ma mangalusi: "Guru Satia Bulan do ahu, ale boru ni rajanami, na ro sian poradang-adangan, mangalului na so jumpang, tumadingkon naung dapot."

"Molo i ma hamu hape, ba ro ma hamu mornapuran tu pantangan on!" ninna Boru Jongjong Anian Si Boru Tibal Tudosan. Ia tangga ni pantanganna i, songon raut pornabung do tajomna, songon piso horis, songon hujur pamunu. Alai dung diida Guru Satia Bulan, na songon i do hape tangga i, indang na boi degehonna, morpingkir ma ibana di hata sidohononna. Dung i ninna ma, "Sahali nari ma, ianggo mornapuran, ale boru ni rajanami, na ringkot dope langkanku, naeng gira mulak tu huta ni da-

mang", ninna. Hape nian, na so barani do ibana manaek tu pantanganna i, dibahen tajom ni tanggana, na songon raut pornabung i, dung i mulak ma ibana.

Dung i lelung ma di porlelengan, lalap ma di porlalapan, laos so muli do Si Boru Jongjong Anian Si Boru Tibal Tudosan. Marsidomdom-sidomdom ma songon soara ni ansuan, adong na nangkok tu dolok, adong na tuat tu toruan, mudur-udur doli-doli, angka sipanggal bulang-bulang, paida-ida halak Si Boru Jongjong Anian Si Boru Tibal Tudosan, tu pantangan portonunan, sada sitiop hajutna, dua siatup napuranna, ianggo hinaulina, tung na so adong do tudosanna. Alai atik pe songon i, sai pasimpar pasebut siraja ni doli-doli paida-ida ibana, tung na so adong do nanggo sada sian i na sinonom ni rohana Ai ingkon sialagundi na bolon do panampulan ni sihala so mimbar hinobolon, ingkon suman dohot rupana asa jadi siadopanna.

Alai dung mulak guru Satia Bulan sian lambung pantangan ni Si Boru Jongjong Anian i, marsak ma rohana laho ma ibana muse morguru, patasak porbinotoanna.

Alai nang Si Boru Jongjong Anian, longang do rohana morningot rupa ni Guru Satia Bulan, na soada anianna, ai saut ma tutu sialagundi na bolon panampulan ni sihala, ai dos ma nasida di hinabolon, tung suman dohot rupana.

Ia dung dipatasak Guru Satia Bulan boto-botoanna, dipulung ma ramuan, borhat ma ibana, ditogihon ma sonduhanna, asa adong bahen donganna, manopot Si Boru Jongjong Anian, na hundul di pantanganna. Alai di na mordalan i nasida, ro ma udan, gabe manisio ma nasida tu sada liang. Hape, di na so pangiriman, di na so panagaman, hinsu ma liang panisioanasida i, ai indada liang i tutu, baba ni ulok do hape, laos dibondut ma nasida tu bagasan. Dung songon i, naeng ma seaton ni Guru Satia Bulan pusu-pusu ni ulok i di bagasan, gabe mangkuling ma ulok i, "Tunduk ma ahu, ale rajanami, unang ma saut gotap pusu-pusungki", ninna.

"Ba molo songon i, dia ma hatunduhanmu?" ninna Guru Satia Bulan manungkun sian bagasan butuha ni ulok i.

Dung i didok ulok i ma muse, "Asal ma unang saut dibuat ho pusu-pusungki, hulehon pe ihurhon di ho; ai molo dipatu-

duhon ho i muse manang tu aha, maleu do i jala mabiar, i ma antong ihur ni ulok, na morgoar sibalun bide.

Ia dung ma inon, malua ma nasida sian butuha ni ulok i, diboan nasida ma dohot ihurna i, mordalan ma nasida, sahat tu harbangan ni portaoar na sumurung. Alai dung sahat nasida ro di si, ro ma biang sangsing, sijaga portungkoan manahopi nasida; alai dipatuduhon ma ihur ni ulok balun bide i, gabe morpo ma harangan ni biang i.

Dung sahat nasida muse ro di alaman, ro ma ulok naeng mamargut nasida; alai dipatuduhon ma ihur ni ulok i, gabe monjap ma ulok i, so ma bisana. Songon i muse ma dibahen tu gompul morunung-unung, tu babiat sibolang.

Ia dung ma inon, dipajonok Guru Satia Bulan ma tu pantangan ni Si Boru Jongjong Anian i, didok ma hatana songon on, "O, situngko ni dulang, sipusuk ni langge, siboru ni datulang, iboto ni lae! Ua asi ma roham, lehon ma saotik mapuran i di ahu!" ninna.

Dung i didok Si Boru Jongjong Anian Si Boru Tibal Tudosan ma mangalusi, "I ma tutu, ale silaklak ni singkoru, sirege-rege ni ampung, sianak ni naboru, ibebere ni damang! Ro ma damang tu son, molo maeng ho mornapuran; ai horbo ni tuan gunung manggagat di dangka-dangka, sangat damang mornapuran, asal unang mago longeanna", ninna.

Dong i dipatuduhon Guru Satia Bulan ma ihur ni ulok i tu tangga i, gabe angkaropang ma i, angkaleu, nangkok ma ibana tu pantangan i laho mornapuran. Dung songon i, longang ma roha ni Si Boru Jongjong Anian Si Boru Tibal Tudosan, dung boi nangkok Guru Satia Bulan tu pantanganna, ai so boi masuk nian manang ise tu si, ia so holan ibana. Songon na hohom ma ibana jolo dohot mamereng pordagingon ni Guru Satia Bulan i, ai sialagundi do panampulan ni bulung sihala, ai tudos do nasida di hinabolon, apala suman do dohot rupana.

Ia dung songon i, laho ma ibana jolo tu jabu ni amana, dialap ma hajutna siat porsanggoloman, ai naeng do jolo bahenonna undang-undang tu Guru Satia Bulan, patuat uti-utian, mambahen guna-gunaan, paboa boru ni Datu na Sumurung ibana, portaoar na lumobi, na morgoar Ompu Raja Iang Debata. Diboan

ma antong hajutna i, dilehon ma tu Guru Satia Bulan, hajut sietek-etek, siat porsanggoloman. Ia dung dijalo Guru Satia Bulan hajut i, didok ma, "Ba dia do hapur, ale boru ni datulang?" ninna. "Dingkan toru do hapur, ale anak ni naboru, tu si ma sigat hamu!" Dung i sai dirungkari Guru Satia Bulan ma sude pangisi ni hajut porsanggoloman i, longang ma rohana, ai atik pe i na sai metmet, sirsir do saampang holan napuran, saampang holan gambir, saampang holan hapur, songon i be dohot na asing. Ia dung songon i, mangkatai ma nasida, didok Si Boru Jongjong Anian ma, "Nitiptip sanggar, ale anak ni raja bolon, bahen huru-huruan, jolo sinungkun marga, asa botoon portuturan. Ba nunga mordemban hita di atas ni papan dohot gulang-gulang, tangkas ma paboa, manang na ise do hamu!"

"Olo ma tutu, boru ni rajanami, ianggo panungkunonmi, alusan ma tutu, di nunga mordemban hita, di atas ni papan, di toru ni gulang-gulung, jala di tarisopo, pantangan portonunan. Ahu ma Guru Satia Bulan", ninna. "Alai ise ma ia hamu?" ninna muse.

"Olo, ale anak ni naboru, ahu ma Si Boru Jongjong Anian Si Boru Tibal Tudosan. Asa molo ho ma hape Guru Satia Bulan, dia ma diboan ho sian hapoltahan ni bulan? Dia ma baliga puli tu gota ni si morgala-gala, dia ma barita na uli, paboa damang sangkambaba!" ninna si Boru Jongjong Anian.

Dung i didok Guru Satia Bulan ma mangalusi, "Adong do huida habang pidong ambaroba, songgop sitapi-tapi tu dolok simorari, na hurang dibuati, na lobi ditambahi", ninna.

Daeng i didok Si Boru Jongjong Anian ma muse mangalusi, "Sada do badanna, dua uluna. Aha do i Guru Satia Bulan?"

"Anduhur mortutu, lote mortio-tio, ndada jengkar mandok na tutu, indada gait mandok na toho. Ulosmi do i dohot na tinonunmi". ninna Guru Satia Bulan, "balintang ma pagabe tumandakkon sitadoan arinta ma manggabe, tondinta masigomgom-an, ale boru ni rajanami", ninna.

Ia dung ma sangon i, manungkun ma muse Guru Satia Bulan, "Beha do, ale boru ni datulang, siulahon do dembanmuna on?" ninna.

"Ba demban siulahon do, anak ni rajanami", ninna Si Boru Jongjong Anian mangalusi.

Dung i dibahen nasida ma janji, patoluna ma nasida ro mangulak dembanna i. Mulak ma nasida, dipapintor ma langkana tu huta ni guruna, dipaboa ma sude pangalahona, undang-undangan na binahen ni Si Boru Jongjong Anian Si Boru Tibal Tudosan i tu ibana, ninna ma, "Ale gurunami! Hutopot do Si Boru Jongjong Anian, boru ni Datu na Sumurung, portaoar na lumobi, dibahen do tu ahu undang-undangan na maol situtu; metmet do nian hajutna, siat porsanggoloman, ia dung husigat isina, adong do sadampang demban, sadampang gambir, sadampang pining sadampang hapur, songon i dohot timbaho; tung longang situtu do ahu jala mabiar ala ni i", ninna.

Alai didok guruna i ma, na morgoar Surta Malim, "Molo songon i, tullang hamu ma sada horbo bahen ulakna, alai so tung mapisik dibahen hamu agiaha sian i. Adong do di son sada seakborhu, tu si ma onjat hamu sude na sahorbo i, dung i taruhon hamu ma i, lehon hamu ma sigatan ni Si Boru Jongjong Anian Si Boru Tibal Tudosan", ninna.

Dung i dipatupa nasida ma songon na nodik ni guruna i, ia dung sidung na sahorbo i dipormasak nasida, so mapisik agiaha, dionjat nasida ma sudena, siat do antong tu seakborhu na sasada i. Dung i borhat ma nasida mandapothon Si Boru Jongjong Anian, diboan nasida ma seakborhu, na morsi juhut na sahorbo i. Alai nunga salpu tingki ni janjinasida di halalahonasida i.

Ia dung diida Si Boru Jongjong Anian nasida dohot kato-banna i, didok ma hatana songon on, "U, ale anak ni rajanami, boasa ma paoto-otoonmu boru adi, ai indada diingot hamu padan; pangose do hamu, ai nunga salpu tingki ni janji", ninna.

Alai didok Guru Satia Bulan ma hatana mangalusi: "Hahuaon ma i, ale boru ni rajanami! Huingot do nian padanta i; alai ala na adong di hami an halak na paturunhon, gabe lalap hami maninondur. I do alana umbahen na so ro hami di janjita i", ninna.

Dung i didok Si Boru Tibal Tudosan ma muse, "Ba molo songon i, sianak ni naboru, ua tung boan ma juhut i nian nanggo saotik daionniba", ninna.

Dung i didok Guru Satia Bulan ma mangalusi, "Anggo i da, siboru ni datulang, adong do di son huboanhami saotik", ninna, huhut dilehon seakborhu binoannasida i.

Disigat Si Boru Jongjong Anian ma seakborhu i, jumpangsa ma tanggo-tanggo. Dung i didok ma, "Boasa so boanonmu nanggo saotik ate-atena i?" ninna.

"Dingkan toru sigat hamu; di si do adong saotik", ninna Guru Satia mangalusi.

Dung i sai dirungkari Si Boru Tibal Tudosan ma jagal i, purguk ma antong mansai godang, ai pungu do di si juhut ni na sada horbo, di si do sude ate-atena, songon i holiholina ro di butuhana, inda tung mapisik agia sibukna ro di gotana. Dung i mansai longang ma Si Boru Jongjong Anian Si Boru Tibal Tudosan mida bahen-bahenanna i, morpingkir ma rohana di bagasan, taringot tu Guru Satia Bulan, ninna rohana ma, "Tung anak ni na tarbarita do on huroha jala tubu ni na hadohan goar: anak ni ise ma on hulaning, na sumurung i?"

Ia dung ma songon inon, masisisean ma nasida taringot di hata saut, unduk masioloan ma nasida di si. Dung i disuru Si Boru Jongjong Anian ma inana mangalompa indahan di jabu, asa mangan halak Guru Satia Bulan dohot siraja ni hatobanna, asa di si ma hataonna utang, manang sadia do sinamot boanonna.

Dung masak indahan i didahan porsonduk bolon, dijou ma nasida mangan, dipasuhar ma ulu ni amak bahen hundulanna, mangundang Guru Satia Bulan, sigodang uti-utian, sideak boto-botoan. Didok ina ni Si Boru Jongjong Anian i ma, "Hundul ma damang, ale Guru Satia Bulan, mangan ma hamuna!"

Alai didok Guru Satia Bulan ma mangalusi, "Beasa ma bahe-nonmu, ale inang, morhangalan bao adi, indang hea suhar ulu ni amak ianggo di lumbannami?!"

"Ba molo songon i, pinaune pe, amang", ninna ina ni Si Boru Jongjong Anian Si Boru Tibal Tudosan.

Ia dung sidung songon i, didompakkon nasida ma sipanganon, dipasang Guru Satia Bulan ma boto-botoanna, ula-ula sitampar dasar, atik tung beha adong na so sipanganon di indahan dohot lompan i. Dujung sidung nasida mangan, manungkun ma natoras

ni Si Boru Jongjong Anian, ninna ma tu Guru Satia Bulan, "Tek-tek, amang, mula ni gondang; serser mula ni tortor, sungkun mula ni hata. Asa na manungkun ma ahu nuaeng: Apala aha do na nilamu, umbahen ro hamu tu son?" ninna.

Dung i ninna Guru Satia Bulan ma mangalusi, "Ianggo panungkunmuna i da, rajanami, alusan ma tutu. Naung tangkas do husise borumena, naung unduk masioloan do hami di hata saut. Asa nuaeng pe, na manungkun sinamot do ahu, manang sadia arga ni borumuna i, ia tung asi rohamuna di na songon iba on, anak ni na pagos", ninna Guru Satia Bulan.

"Ianggo i do hape, umbahen na ro hamuna, ba sijalo na godang do ahu, ai tuk do bahenonmu; ingkon singkop do goar ni nasa sinamot lehononmu boli ni borungki, asa saut i di ho", ninna Datu na Sumurung, portaoar lumobi.

Dung i didok Guru Satia Bulan ma mangalusi: "Ba ianggo i do, asal ma saut di ahu barumuna i, lehononku do nasa na tar-lehon ahu."

Dung songon i pangkataionnasida, ditogihon Guru Satia Bulan ma nasida tu toru, asa patuduhononna sinamot silehononna. Dung sahat nasida ro di toru, dibuat ma angka imbulu na pinapunguna i di garung-garung i.

Dibuat ma imbulu ni horbo, gabe horbor ma niida torop di si; dibuat imbulu ni lombu, gabe lombu ma torop idaon di si; dibuat imbulu ni hoda, gabe hoda ma torop idaon di si; songon i ma dibahen patubu angka pinahan na asing. Ia dung sidung dipatuduhon nasa ragam ni pahan-pahanan, diullus muse ma pura-pura, dionjati ma mas tu bagasan, dipatubu ma godang ringgit, dibahen ma i tu pinggan ribar, dipasahat ma i sudena tu Datu na Sumurung, portaoar na lumobi, bahen boli ni Si Boru Jongjong Anian Si Boru Tibal Tudosan, hau jadi-jadian, jolma na so hatudosan. I ma mula ni boli ni boru sapura-pura na hinsic, dohot ringgit sapinggan ribar, satangan baju.

Ia nunga sahat sinamot i sudena, mangkuling ma Datu na Sumurung, portaoar na lumobi, didok ma tu Guru Satia Bulan, "Ba nunga tutu saut dilehon ho sinamotmi, boli ni borungku Si Boru Jongjong Anian Si Boru Tibal Tudosan, na so maranian, na so mortudosan, ba saut ma i tutu di ho. Alai adong dope

dohononku di ho, na so jadi dohononmu do goarhu dohot goar ni angka hasubanganmu; anggo tung dohononmu do i, na paleahon do ho di hami, mulak ma sinamotmu, indang saut borungki boanonmu", ninna.

"Ba angka dia ma huroha, ale amang, asa huboto pasidingonku? Patut do i na nidokmu i, ai sitongka do tutu dohononku goar ni baongku dohot nasa hasubanganku", ninna Guru Satia Bulan.

Dung i didok Portaoar na Sumurung ma, "Ianggo i, ale bere, paboaonku ma, ai taho do godangna, angka hata goar-goar na so boi dohononmu. Tangkas ma tangihon, asa ingotonmu; lului ma hata pasilihon, unang be i dohononmu, ai sude sigoaranki, luhut do i goar ni porsubanganmu. Asa angka on ma na so jadi dohononmu, paboa na olo ho pasangaphon ahu: ulu, abuk, pinggol, mata dohot nasa goar-goar na di daging. Dung i: ompu, ama, ina, na nioli, bere dohot nasa portuturan, Dung i: ulos, baju, mas hepeng, indahan, sira, aek dohot nasa goar-goaran ni ugasan. Molo boi i pasidingonmu, na so jadi dohononmu, ala luhutna i goar ni porsubanganmu, saut ma ho gabe helangku; saut ma borungki di ho, bahen siadopanmu, ai pos ma rohangku, na morsangap ahu bahenonmu, Alai tangkas ma dok damang, anggo so boi do i oloanmu, indada na manjua ahu paulak sinamotmu, gabe borungki, lului damang boru ni halak olionmu", ninna.

Dung i marsak ma roha ni Guru Satia Bulan umbege na nidok ni Portaoar na Sumurung i, ai indada na boi di rohana pasidingonna sude na nidokna i; dung i dipangido ma janji tu na naeng simatuna i, di bagasan tolu ari ibana mamingkiri angka hata sipasingon i, dung pe i musengani, asa ulahanna ro tu huta i, paboa-hon ujung ni pingkiranna, manang na boi pasidingonna angka goar na nidokna i.

Dung i mulak ma jolo Guru Satia Bulan, mansai marsak do rohana, umpingkir pangidoan ni Portaoar na Sumurung, na nidokna tu ibana; digalmit ma hurumna, ditompok lambiakna, angka-berbur ma iluna ditangkupi hambirangna.

Ia dung sai tangis ibana diida sada boru natua-tua, disungkun ma ibana, ninna ma: "Boasa sai tangis ho, ale Guru Satia Bulan? Aha do na niarsakkonmu, ale anak ni na hadohan goar?" Dung i dipaboa ma holong ni rohana di Si Boru Jongjong Anian Si

Boru Tibal Tudosan, halak na so moranian, na soada mortudosan, dohot naung sahat i sudena sinamotna, holan angka hata na pinangido ni amana Portaoar na Sumurung i nama dipingkir rohana, na so boi pasidingonna. Dung i didok muse ma tu boru natuatua i, "Taganan nama ahu langge unang singkoru; ba taganan nama ahu mate unang mangolu, anggo tung so saut be Si Boru Jongjong Anian Si Boru Tibal Tudosan bahen siadopan", ninna. Alai patut do antong dohononna songon i, ai hau sialagundi do panampulan ni sihala, ai dos do hinabolonnasida, tung suman do dohot rupana.

Dung i didok boru natuatua i ma muse tu Guru Satia Bulan, "Ai angka dia ma huroha, na so jadi dohononmi didok?" ninna.

Jadi dipajojor ma sude na pinangido ni Portaoar na Sumurung i, didok ma, ulu, mata, horbo, hoda, mas, babi, solu dohot mansai lan angka na asing goar na so jadi dohononna.

Dung i didok boru natuatua i ma muse, "Ianggo i do hape, unang pola sai tangis ho; dohot na sai mura! Ba molo so boi, ninna, dohononmu ulu, ba simanjungung ma dok; mata ninna, ba simalolong dok; obuk ninna, ba sitarupon dok; pos roham, saut do boruna i di ho, anggo holan i do jut ni roham", ninna; diajarhon ma dohot goar-goar ni na asing i sudena tu Guru Satia Bulan.

Dung i mansai las ma roha ni Guru Satia Bulan, laho ma ibana tu lumban ni simatuana dung jumpang padannasida i. Ia dung jolo sidung nasida morsipanganon, manungkun ma Datu na Sumurung portaoar na lumobi tu Guru Satia Bulan, ninna ma, "Beha do ujung ni pingkiranmu, di sude na hudok i, ale bere? Boi do pasilionmu angka hata na hudok i sude?" ninna.

Jadi didok Guru Satia Bulan ma mangalusi, "Na maol do i nian patupaon, sude na nidokmuna i, ale tulang natuatua; alai asal ma saut borumuna i di iba, ba hahuaon, nioloan, nama pasilihon sude goar na nidokmuna i, Antong tangihon hamu ma, asa hupajojor!" ninna.

Dung i dipajojor ma antong songon on: Ulu = simanjungung; obuk = sitarupon; pinggol = simanangi; mata = simalolong; pamanangan = simangkudap; abara = porsitangkingon; mangompa = morsitangkingon; susu = sitairon; tangan = simangido, simanginon; butuha = siubeon; pat = simanjojak; porhohom = posoara igilon.

Dung i, hinamulian, na nioli = siadopan; ompu, pahompu = sisumbaon; ama = na sumuan; ina = na mangintubu (ia baea mandok); ina = na umbeu (ia boru-boru mandok); anak = sinuan tunas; boru = sinuan beu; tulang, nantulang, bere = sibijaon; amangboru, namboru = siunungbane, silumbane; lae, eda = silansapon; haha, anggi = siadosan, sialosan; iboto = ibot; ibotona = situan ni ibotna; ibotongku = pinaribóthu; simatua baea = amang na umbalos; simatua boru = inang na umbalos; hela = amang na binalos; parumaen = inang na binalos.

Dung i: Ulos = siteburon; baju = saem sipoholon; mas = sigumorsing; hepeng, ringgit = sihumisik; eme, indahan = paigon; sira = silumangsajjur; aek = aek silumanlan; dengke = urat ni hapongkion; solu = sirinsiron, siruminsir; hole = hole sibulung-bira; ruma, jabu, bagas = isian ni agalangon; sopo = isian ni hatungkolon; api = sigumorgor, sihumilas; horbo = silumatahon; hoda = sijumambe ihur; lombu = silomlom di robean; babi = simornangkat ni nambur; asu, biang = siteuon; hatoban = halung ni na mauli bulung; hauma = tonga ni lobongan; tahu-tahu = siantuk na risi; napuran = sirumata bulung na opaṭ sada haroburan; mornapuran = morsirumata bulung; duhut-duhut = silumuhut; bodil = sitenggar ni banua; hujur, giringan, raut, piso (dohot na suman tu si) = sirumantos; tonun = sitipahon; mortonun = morsitipahon; manuk = simorhuruk; bargot = silumambe hodong; tuak = hua ni silumambe hodong; hau = sinaiton; dolok = dolok simanabun; lombang = lombang siruruson; bulu = situ-lison; onan = onan porsingguran, nantiga porsaoran; halang ulu = porpidoan; hundul = morsijuguhon; na susa (so morhasoan) = hundul-pualpualon, tinjang pangalaloon; anak sasada mate = na songon sagak di panabian; anak sasada = songon halak kalak na tarpunjung, songon tandiang na hapuloan; tali = sipudoron; hatoropan = mangajana; halak dongan sahorja = simardung ni bulunta; mornonang = morsimangkudap; mangkatahatai dohot dogan sahorja = morsimangkudaphon simardung ni bulunta; lelung mangolu = mauja matoga; huta = tonga ni asean; halak = simardung; sada simardung = sada halak; dua simardung = dua halak; borngin = sihabornginan; arian = siharianan; porsoro ni ari = lubanglubang panarean, talaga panduduran; naek pangabahan =

magodang panaguan; surut pangabahan = maetek panaguan; sahit = siaginin; tanoman = situmandok, situmalin; lagu = palilung; hama-tean = padang silungunon; mate = marobur.

Dung sidung dipajojor Guru Satia Bulan i saluhutna, didok ma tu simatuana i: "Paborhat ma hami dohat borum, ale tulang, asa laho hami tu lumbannami!" ninna.

Alai didok simatuana i ma mangalusi: "Indang na manjua ahu paborhat hamuna, ale bere; alai adong dope pangidoanku tu hamuna; molo boi i patupaonmuna, ba i pe asa saut borongki boanonmuna", ninna.

"Ba dia dope huroha, ale tulang? Haru dok hamu ma, asa huboto manang na boi patupaonku!" ninna Guru Satia Bulan.

Dung i didok simatuana i ma: "Saburhononku ma sude longa, na pitu amfang, na pitu pormasan pitu jual pitu solup dohot pitu bale dohot pitunggim tu duhut-duhut an; dung i ingkon papunguonmu ma i muse mulak tu ingananna dung husaburhon. Ia boi do i patupaonmu, ba i pe asa saut hamu paborhatonku dohot borongku tu lumban ni natorasmu", ninna.

Jadi marsak ma roha ni Guru Satia Bulan umbege hata ni simatuana i, mulak ma ibana huhut tangis mandapothon boru natua-tua na mangajari ibana i; dialu-aluhon ma tu si jut ni rohana mamingkir maol ni pangidoan ni simatuana i.

Jadi dung dibege boru natuatua i sude hata na nidokna i, ninna ma, "Unang pola sai marsak ho, anggo holan i do, ai na mura do i! Anak ni raja do ho, anak ni na hasantian, tubu ni na morsanggap jala na hadohan goar. Tonggo ma sude raja ni manuk-manuk, sude na morgoar pidong, asa i mamutihi longa i dung disaburhon, paulakkon tu ingananna i!" ninna.

Dung songon i ajar ni boru natua-tua i, mulak ma Guru Satia Bulan tu lumban ni simatuana inon, didok ma songon on, "Hahuaon i, ale rajanami, asal ma saut di ahu borumuna i, haru saburhon hamu ma longa na nidokmuna i, asa huputihi mulak tu ingananna!" ninna.

Dung i disaburhon Datu na Sumurung, portaoar na lumobi ma sude longa i, didokkon ma i putihan ni Guru Satia Bulan, asa mulak tu ingananna.

Jadi mortonggo ma Guru Satia Bulan dijou ma nasa manuk-

manuk, saguman ni nasa pidong, gabe ro ma i luhutna mamutihi longa i. Ia dung pungu longa i sude mangulahi, ba dipasung ma i muse tu ingananna hian. Dung i didok ma muse tu simatuana i, "Paborhat ma hami, ale rajanami, asa laho hami dohot borum tu lumbannami, ai nunga hupasahut songon na nidokmuna i", ninna.

Alai didok simanuana i ma mangalusi, "Na denggan do i tutu; las do rohangku paborhat hamu; alai jolo boan ma di ahu sada hoda na mortanduk, hambing bolon na so mortanduk dohot sada manuk na so morbaringbing dohot sada lote na morlai-lai. Asal ma hatop i jumpang hamuna, diboan hamu tu ahu; hatop do hamu paborhatonku", ninna.

Dung i marsak ma muse roha ni Guru Satia Bulan umbege hatana i, mulak ma ibana mandapothon boru natua-tua i, dipaboa ma muse pangidoan ni simatuana i.

Dung i didok boru natua-tua i ma, "Laho ma ho muli, pangke ma nasa na binotom, bahen ma nasa sibahenonmu, patuat ma nasa boto-botoanmu, mandormai boruna i, molo naeng saut i di ho, ai nunga siat i bahenon ni Debata", ninna tu Guru Satia Bulan.

Jadi laho ma Guru Satia Bulan manopot guruna Datu Surta Malim, dipangido ma sian i dorma na sumurung. Dung i didokkon guruna i ma ibana manulung, didokkon ma buatonna nasa ranggas, tar sanjongkal be ganjangna. Ia dung pungu i luhutna dipulung, diboan ma i tu huta, dibahen ma tu si dohot ramuan na asing, ditabashon guruna i ma tabas ni dorma sitogu losung, si-sunggul na modom, sipahehe na hundul, sihidahida na mordalan. Ia dung sidung i ditabashon, ditutung nasida ma ranggas na pina-punguna i, gabe mangibul ma timusna i laho tu huta ni Datu na Sumurung, portaoar na lumobi, tu pantangan portonunan ni Si Boru Jongjong Anian Si Boru Tibal Tudosan, gabe sai humasung-seng ma ibana di portonunanna i, sai guga ma rohana, hehe hundul ma ibana, sai songon na hiniaphon ma ate-aten tu Guru Satia Bulan. Ia dung songon i ibana diida amana Datu na Sumurung, portaoar na lumobi, ro ma hatana manungkun boruna i, "Boasa sai songon na humasusa ho, ale angkora?" ninna.

Dung i didok Si Boru Jongjong Anian ma mangalusi, "Aha ma so songon i ahu, ale amang, ai so huboto manang na di pudingku nuaeng Guru Satia Bulan manang na di jolongku; so huboto manang na tu dia ibana dapothononku, ai sai songon na bineta-beta do rohangku, sai songon na hiniaphon do ate-atengku", ninna.

Dung i dimuruhi amana i ma ibana ala ni hatani i, didok ma, "Tung na so jadi do ho laho tu si, anggo so jolo boanon ni Guru Satia Bulan tu ahu na hupangido tu ibana i", ninna.

Alai indang tartaton Si Boru Jongjong Anian be pangkida-hida ni ate-atena, ai nunga hona sipanggila-gila ni Guru Satia Bulan ibana, dung dipasang dorma i, puas ma ibana tu balian, diihut-ihut ma timus na ro i, pajumpang ma ibana dohot Guru Satia Bulan di tongan dalan, ai nunga ro hian i manomu-nomu ibana, laos diboan ma ibana tu hutana.

Ia dung diboto Datu na Sumurung, partaoar na lumobi, naung manurun boruna i, songon on ma porhusarion ni rohana di bagasan, "Hurangna do i tahe di ahu, di pambahenanki; ai atik pe naung sahat sude tu ahu sinamot na nilehonna i, sai huganjangi dope nonang mambahen undang-undangan i. Patur do muruk Guru Satia Bulan di pambahenanki, tama do ibana mamasang dorma manggila-gila borungki. Husuru ma na mangalapi nasida siraja ni naposongki, asa denggan nasida hupaborhat, borungku siangkup ni helangki", ninna rohana.

Dung i disuru ma raja ni hatobanna mangalapi boruna dohot helana, pintor ro ma antong mandapothon ibana tu hutana.

Ia dung ro nasida, mangkuling ma ibana, songon on ma didok tu helana, "Hurangna do i di ho, ale bere; molo so boi nian patupaonmu na hudok i sude, ba i do nian paboanmu tu ahu." Anggo i, dormam do dipasang ho mameta-meta borungki, songon na mambahen haurahon di Si Boru Tibal Tudosan i. Alai atik pe i songon i, ale bere, indang pola sadia murukku, borhatanku ma hamu ture; di ari patoluna, borhat ma hamu muse, laho tu lumbanmuna, di si ma hamu morune", ninna.

Dung i ninna helana i ma mangalusi. "Olo, rajanami, nunga hurangna i di ahu, alai atik pe songon i, na poso dope ahu, na so sadia roha, na so sadia lagu; asa siajaranmuna dope ahu", inna.

Dung i diparade Datu na Sumurung, portaoar na lumobi ma angka pauseangna sibonanon ni boruna; dipasingkop ma dohot sipanganon usungonna.

Ia dung jumpang ari patoluna, didok boruna i ma, "Borhat ma hami, ale amang, tu lumbannami!" ninna.

Dung i didok amana i ma mengalusi, "Ba borhat ma tutu dainang, rap dohot helangki. Gabe ma dainang, sorangan ni laklak, sorangan ni singkoru, sorangan ni anak, sorangan ni boru, Gabe ma hamuna jala morbarita, godang ma hodamu dohot lombumuna; alai indang piga ia anakmu, alai sai torop ma ia pinomparmuna!" ninna.

Dung songon i Didok Datu na Sumurung, borhat ma Si Boru Jongjong Anian, dohot hinamulianna i, tu hutanasida, diboan ma dohot angka pauseang na nilehon ni amana i.

Ia dung ma inon, jus ma ninna solu, sar ma ninna tahu-tahu; pur ma barita, sar alu-alu tu Datu Panggana, songon i dohot tu Portigatiga Torus, naung dipamuli Datu na Sumurung, portaoar na lumobi, Si Boru Jongjong Anian Si Boru Tibal Tudosan, hau jadi-jadian, na so mortudosan, tu Guru Satia Bulan, anak ni na tarbarita, tubu ni na hadohan goar, so pamotoannasida. Dung i disuru ma pangulu mandok hata tu Datu na Sumurung, portaoar na lumobi, manang na dia do umbahen na hum rohana pamuli Si Boru Jongjong Anian Si Boru Tibal Tudosan so pamotoannasida.

Jadi dung sahat pangulu i tu huta ni Portaoar na Sumurung, didok ma hatana songon on, "Ale rajanami, Datu na Sumurung, portaoar na lumobi! Boasa ma pamulionmu, antong Si Boru Jongjong Anian Si Boru Tibal Tudosan, ai na ginana ni Datu Panggana do i, bao pamabarbar na sumurung jala na pinorulosan ni bao Portigatiga Torus? Angatmu do i, toismu tu nasida, ai nasida do nampuna boru di si", ninna.

Alai didok Portaoar na Sumurung ma mangalusi, "Palias ma hatam; ai godang na ginana ni halak, na pinorulosan ni deba, anggo so boi mangolu bahenonna, ba tu aha dohononna?!" Ahu do ama ni Si Boru Jongjong Anian, ai ahu do mambahen i mangolu, indang aha na niantoan ni Pamabarbar na Sumurung di si dohot portigatiga torus. I ma hatangku", ninna.

Dung i didok pangulu i ma muse, "Ba molo i ma ujung ni hatam, ale Datu na Sumurung, portaoar na lumobi, indang tarbahen so mormusu be hamu dohot nasida, siala ni Si Boru Jongjong Anian; alai anggo siat nian sipaingot tu hamu be, unang pola sahat ro di gora, mordenggan ma hamu!" ninna.

Dung i didok Portaoar na Sumurung ma mangalusi, "Anggo i, mormusu pe taho, indang pola mabiar ahu. Ditutu ma pegena morhori-hori harangan; dituntun ma lomo ni ate-atena, inda urang so boi do hutampar? Indang aha dohononna taringot tu borungku Si Boru Jongjong Anian Si Boru Tibal Tudosan, na so moranian, na so mortudosan. Ahu do ama ni i, ai ahu do mambahen taoar tu si umbahen na mangolu. Anggo so toho na hudok i, juap antong songon na mormeam; alai anggo toho do na hudok i, sai talu nasida bahenonku," ninna.

"Ba molo tung sai i ma pandokmu, ujung ni hatam, ba i ma paboan tu halak an na dua", ninna pangulu i.

Dung i laho ma pangulu i mandapothon Pambarbar na Sumurung, panggana na lumobi dohot Portigatiga Torus, dipaboa ma tu nasida sude hata ni portaoar na sumurung i.

Dung dibege nasida hatana i, didok ma mangalusi, "Angatna do i, toisna, tung songon i hape dohononna?! Anggo tutu do hami manggana i dohot mambahen ulosna, dohot mambahen mas tu pinggol ni Si Boru Jongjong Anian, ba talu ma ibana bahenonnami. Alai molo so tutu do na hudokhami juap ma tutu songon na mormeam. I ma siudiyonnami", ninna nasida na dua.

Dung i tole ma nasida sampak aek, pultop ma gora i, masibodilan ma nasida. Leleng ma di porlelengan, lalap di porlalapan, nasida na mangula gora i, suda indahanna, suda juhutna, matostos sangkalanna, maputput buluna, laos so mornaujung goranasida i, ganup ari nasida masibodilan. Andalu pe soada jala bonang pe so adong; na talu pe soada, na monang pe so adong; juap di bodil, juap di hujur, ia indahanna suda.

Ia adong ma sada halak, na margoar Si Siak Bagi Si Aji Gagajaja, na laho tu ramba-ramba masiporbue ni hau harangan, asa adong panganonna. Ia dung sahat ibana ro di harangan i, ro ma singlar madabu, gabe laho ma ibana manisio tu hau na ruangan, hundul ma ibana di si. Dung i adong ma dibege ibana angka anak

ni bodat mangkatai, songon on ma didok na sada, "Oe, loja ni angka jolma i, na mangula gora i, lola nasida so mulaulaon, tondan nasida so mangula, holan paida-ida hepeng, boli ni Si Boru Jongjong Anian Si Boru Tibal Tudosan i. Tung na oto ma nang angka raja porhata i; na sai mura sihataon, so boi uhumonna", ninna.

Alai ro ma dongan ni bodat i mangalusi, "Ba dia ma nian bahenonmu, aut tung sura ho manguhum, gora ni jolma manisia i?" ninna.

"A, na so tarbahren do iba gabe jolma manisia; aut tung sura na tarbahren mura situtu do i uhumon. Ai aut dibahen Pambarbar na Sumurung, panggana na lumobi sijalo upa ompu; dung i Datu na Sumurung, portaoar na lumobi ma dibahen ama pangintubu, suhut porboru; dung i Portigatiga Torus i ma dibahen sijalo upa tulang, ai i do sibahen abitna dohot paheanna; ba diporulosi halak do berena. Aut na songon i dibahen angka raja porhata i uhumnasida, nunga tibu morujung gora i, sae sihataon. Anggo i, dioloi nasida do tondan so mangula, lola so mulaulaon, bahenon ni sihataon na sai mura", ninna.

Dung songon i dibege Si Aji Gajagaja pangkataion ni bodat i, siang ma singgar i, mulak ma ibana sian harangan. Manurbu ma di poring, mangarabi ma di tandiang; marpingkir ma ibana borngin, patupahonsa ia arian. Dung i ditopot ibana ma Datu na Sumurung, portaoar na lumobi, didok ma hatana songon on, "Beha do, ale rajanami! Ia tung hupahata ma goramuna on? Loja hamu, tondan so mangula, pagodang-godang harugian", ninna.

Alai didok Datu na Sumurung, portaoar na lumobi ma mangalusi, "Oe, ale Aji Gajagaja! Haru angka raja, na pande morhata, na sangap na sumurung, nunga mulak pahatahon, so bolas pahataonna. Ba lam ho ma, ale Siak Bagi lapung hiap?" ninna.

Dung i didok ma muse, "Unang songon i da, rajanami! Mulak pe angka raja pahatahon goramuna on, indada dohononku. na so malo nasida manimbang uhum. Alai on do dohononku: anggo so goar ni uhum na toho do sidohononku, inda mulak ahu?" ninna.

"Molo songon i", ninna Porgaoar na Sumurung, "tu duru ma hata mabuk, tu tonga-tonga ma hata uhum; pahata ma gora i, indang panjua ahu di uhum na tingkos", ninna.

Ia dung songon i, laho ma Si Aji Gajagaja tu Datu Panggana, pambarbar na sumurung, dohot tu Portigatiga Torus, didok ma tu nasida, asa pahataonna gora i. Ia dung unduk masioloan nasida, di na olo pahataon, gabe pongpang ma gora i dibahen Si Siak Bagi Si Aji Gajagaja, digondit ma titi ni ari asa mordompak nasida.

Dung jumpang titi ni ari i, ro be ma nasida tu porholangan, mordompak ma nasida dibahen si Siak Bagi. Ia dung pungu nasida di si, mangkuling ma ibana, didok ma hatana songon on, "Aha do upangku lehononmuna, ia sae hupahata porbadaanmuna on?" ninna.

Dung i didok angka suhut porgora i ma, "Unang so tingkos do uhummu, ture timbanganmu, sitotari na rundut, siangkat na polin, sipijor na ganggang, ba lehonon do godang upam: ogung, mas, ringgit dohot angka na asing."

"Molo songon i, nunga na uli", ninna Si Aji Gajagaja, "on ma uhumhu: Unang be sai gulut hamu morgora, boti ma bahen hamu taringot tu Si boru Jongjong Anian Si Boru Tibal Tudosan Haae Jadijadian na Soada Mortudosan. Sijalo upa ompu ma bahen hamu Pambarbar na Sumurung, panggana na lumobi, ai ibana do toho mambarbar dohot manggana Si Boru Jongjong Anian. Sijalo upa tulang ma bahen hamu Portigatiga Torus, ai toho do dibahen ibana ulosna dohot nasa paheanna. Dung i ianggo ama pangintubu, i ma Datu na Sumurung, portaoar na lumobi, portaoar pangabang-abang, portaoar pangubung-ubung, siubung hosa mate, siparata naung busuk, ai toho do taoarna mambahen, asa mangolu Si Boru Jongjong Anian hau jadijadian, jolma na so hatudosan", ninna.

Dung songon i timbanganna, uhum na ginoarna, dibege sude halak na di pordompahan i, luhut ma angka raja manohoi dohot mangondolhon uhum i, gabe i ma sauetna, sae sihataon i, denggan be ma nasida muse masiebatebatan, masipiring-piringan morningot portuturannasida i. Si Aji Gajagaja pe, diboan ibana ma sude upa morhata, naung pinadanhon ni angka suhut i tu ibana.

Dung ma inon, hu ma di bulanna, gokma di taonna, dung gabebean Si Boru Jongjong Anian Si Boru Tibal Tudosan, hape matua so olo tubu na di hiringan manuk, matua so olo topak na di dalam laut; ia dagingna nunga mansai morniang mangae. Dung i

didok Guru Satia Bulan ma mandok jolmana i, "Aha do pangido-anmu, sinta-sinta ni roham, ale inang siadopan asa tiur haroan, sorang na di dalam laut?" ninna.

Dung i didok jolmana i ma mangalusi, "Unang damang pahatur-hatur bulung ni bulu, parigat-rigat bulung ni goal, parungka-rungka hinalungun, pasigatsigat hinadangol, ale amang siadopan", ninna, "atik tung so dapot i maon jalahanmu."

"Aha huroha, boru ni raja bolon; anggo boi do luluhan, mansot tu dia hujalahi; mulakna, molo tung so jumpang", ninna Guru Satia Bulan.

"Ba, molo songon i, ale amang siadopan; lului damang ma ate-ate ni ulok dari, ai i do na naeng panganonku, na sininta ni rohangku", ninna jolmana i.

Dung i laho ma Guru Satia Bulan, tu harangan na limuton, tu tombak na ngolngolan, tu pongki na ngirngiran, tu mombang boru, diida ma di si sada ulok dari. Dung i diumpat ma pisona piso horis, disaputi ma dagingna dohot ijuk, dibahen ma dohot taoar, dihatahon ma subutan ni sitampar dasar, disunggul ma ulok i. Dung tarsunggul ulok i, dipargut ma ibana, gabe sangkot ma ngingina di ijuk i. Dung i ditampulhon ibana ma piso horisna i tu ulok i, tipul ma dibahen, gabe dilapa ma i mambuat ate-aten; diboan ma i tu huta, dilehon ma i panganon di jolmana. Humipas ma antong dihilala Si Boru Jongjong Anian, dung dipangan ate-ate ni ulok i; alai laos so olo do sorang ianggo na di bortian.

Dung i muse di laonlaon ni ari, morsahit-sahit ma jolmana i, gabe disungkun Guru Satia Bulan ma ibana, "Aha dope dipangido roham naeng panganonmu, ale boru ni rajanami?" ninna.

"Ate-ate ni lali piuan ma nian, aut jumpang, ale anak ni rajanami", ninna jolmana i mangalusi.

Dung i laho ma ibana mandiori lali piuan; dung dapotsa, dibuat ma ateatena i, dilehon panganon ni jolmana i. Humipas ma antong dihilala, adung dipangan ate-ate ni pidong i.

Alai muse, manguhahi ma sahitna i, gabe disungkun Guru Satia Bulan ma ibana, manang aha dope na naeng panganonna.

Dung i didok jolmana i ma, "Gala-gala sirumondang bulan ma nian, na sataon manggus-anggus, na sataon moltuk-oltuk;

dibahen hinadaina, dibahen hinatabona, unang na morihot dila, nunga toguonna", ninna.

Dung i tangis ma Guru Satia Bulan, laho ma ibana mangalului gala-gala i; ia dung dapotsa, mulak ma ibana mamboan i, laos dilehon ma panganon ni jolmana i. Humipas ma jolo dihilala, dung dipangan gala-gala i; alai muse, mangulahe do burhung, so boi morot.

Dung i sai marsak ma Guru Satia Bulan, didok ma muse tu na nielina i, "Ba dia do, ale inang? Ua tung tangkas ma paboa, manang na dia na sininta ni roham, tinodo ni simalolongmu, siallangon na naeng panganonmu; anggiat tubu na di bortian, sorang na di dalam laut", ninna.

Alai ro ma alus ni jolmana i, "Rohangki nian, ale amang! Tung na so sorang dope na di bortian, anggo so jolo hupangan dope gaol siaunan dohot pinasa sigara ni api", ninna.

Dung i laho ma Guru Satia Bulan mangalap i; diboa ma i laos dilehon panganon ni jolmana i.

"Ba, aha dope, ale inang, na naeng panganonmu?" ninna muse manungkun.

"Ingkon panganonku dope ihan lumba-lumba, na manggat di limut, na mandilat-dilat tu batu, na morsisik na saanduri, na mormata na samaung-maung". Dijalahi Guru Satia Bulan ma nang i, alai laos so sorang do na di bortian, laos so topak na di haringan manuk.

Dung i mandele ma Guru Satia Bulan i, didok ma, "Na pala-loja-lojahon do ho di ahu, ale inang?" ninna.

"Rohangki nian, ale amang! Alai tung na so sorang dope na di bortian, ianggo so jolo hupangan asu sijurame tunggal, huring boru-boru, baliang na bara", ninna.

"Ba, tung tutu ma sorang na di bortian, na di dalam laut, ia dung hubuat i, ale boru ni rajanami?" ninna Guru Satia Bulan tu jolmana i.

"Ianggo ninna rohangku nian, ale anak ni rajanami", ninna jolmana i mangalusi.

Ia dung dilehon i panganonna, hape laos so tiur do haroan, laos so adong ummaha sahitna, rap tangis ma nasida na dua. Dung i didok Guru Satia Bulan ma muse tu jolmana i, "Hahuaon,

ale inang! Haru paboa ma na naeng panganonmu; ianggo halojaon-niba i, ba tinaon. Andalu panduda, anduri pamiari; indang dapot tarjua pandokkon ni soro ni ari; nasa na boi jalahanki, tung ingkon do hujalahi. Unang ma songon na maila rupa dainang, matangga bohi, paboahon na di rohami", ninna.

Dung i ninna Si Boru Jongjong Anian ma mangalusi, "Sorang ma na di hiringan manuk, ale amang; humiap ma langgungung, masitungkol sopona ma halak, ia dung dibuat ho sada nari panganonku, i ma: manuk mira sialtong, iboto ni manuk boru-boru, na morsiajar mortatahuak di bulan sipahatolu. Binsar siulubalang ari, dipangulahon i, poltak sirumondang bulan, dipambauhon i", ninna. Dung i dibuat Guru Satia Bulan ma i, laos dilehon panganon ni jolmana i.

Ia dung dibuat i, humuntal ma langgungung, mangkuling ma ronggur, roma udan so hasaongan dohot alogo na so haamudian. Sorang ma tutu na di bortian, topak ma na di dalom laut, na di hiringan manuk ni Si Boru Jongjong Anian; diida andong, morporhas do, ai dua sahali tubu, sada baa, sada boruboru.

Bulung ni gaol pinariga-riga,
Andorang so tubu, naeng na hurang gira,
Hape ia dung tubu, nunga sumolsol bagina.

Ai tubu poso-poso i rap dohot ibotona, masijoloanan do nasida, masijanggingan dohot pusokna.

Ia dung ma i, ditaha ma saganon, soban bulu soban hau, tole ma nasida mangkaroan. Saborngin dope dung tubu, nunga siup-siupon, ai hatop do morbolon songon gundur, morgumbang songon nasoli, tole padua bornginhon, nunga hundul-hundul, sabulan dung topak, nunga mordalan-dalan, indang diboto na morsubang, masigogoitan do nasida na dua.

Dung diida natorasna i songon inon pangalahonasida digalmit ma hurumna, digotil lambiakna, angkadekdek ma iluna, binahen ni arsak ni rohana; didok ma tutu angka anakkonna i, "Tongka do masigogoitan na moriboto", ninna.

Alai didok nasida be ma mangalusi, "Aha di si, ale inang! Rosu ni rohangku do i di ibotongki!"

Ia dung ma inon, dipungka na tubu i ma goarna: Si Aji Donda Hatahutan, guru na sungkot ro di langit, datu na tondal di tano, porjumbak siupar mangalele ma goar ni baoa i. Si Boru Sopak Panaluan, pordorma na sumurung, dorma sihutu ni asu ma goar ni ibotona i.

Dung godang-godang ansimun nasida, ingkon rap do nasida mangan, na so tupa morsijoloi. Dung i didok Si Boru Jongjong Anian ma tu nasida na dua, "Indang ture i ale, na binahenmu i, ai morsubang bolon do halak na moriboto", ninna. Alai didok Si Aji Donda Hatahutan ma mangalusi hata ni inana i, "Holong ni rohangku do i da, inang, di ibotongki", ninna.

Dung i lelung ma muse di porlelengan, lalap ma di porlalapan, dijou Si Boru Jongjong Anian ma muse boruna Si Boru Sopak Panaluan i, didok ma tu si songon na nidokna tu Si Aji Donda Hatahutan. Alai didok ma alusna, "Holong ni rohangku do i, da inang, di ibotongki".

Dung songon i, digalmit ma hurunna, ditompok lambiakna, angkadekdek ma iluna, ditangkupi hambirangna, ai indada maila be diida anakkonna na dua i masigogoitan dohot masisande-sandean. Nang pe sai dipinsang nian nasida, indang be dipaotap mangulahon na so uhum, pasombu hisap ni dagingna. Nang pe torop halak mornida hajahaton ni Si Aji Donda Hatahutan rap dohot ibotona i, indang adong dihailahon, atik pe nian tihas bolon i. "Inang, soro ni aringki, sambor ni nippingkon, haurahon ni ahu lapung i, di pambahen ni anakkonkon", ninna Si Boru Jongjong Anian di bagasan rohana.

Dung i didok ma mandok anakna i, "Ua laho ma damang, mangguru hadatuon; ai so sinamot soada, so hepeng na hurang. ai sasasda ho do anakku, tampuk ni pusu-pusungku, ihot ni ate-atengku. Las ari di jolo ruma, sinarat amak tu jolo sopo; las ari di jolo sopo; sinarat amak tu jolo ruma; na laga mangan do datu, na so siar mangula, siuli ulos na so pola mortonun, silehet tali-tali, na so pola manuhor, sigongkonon mangan do i, siapohan minum, sisungkunon di ari na uli, di bulan madenggan. Asa guru-hon damang ma hadatuon i, asa i hasurunganmu sian donganmu jolma!" ninna. Alai didok pe songon i, asa humolang do di rohana

anakna i sian ibotona Si Boru Sopak Panaluan i, unang sai didat-dati nasida hajahatonna i.

Dung i didok anakna i ma mangalusi, "Denggan ma i, ale inang alai molo borhat ma ahu, jou ma jolo ibotongki asa jolo hupasombu siholhu, ai padua-dua do hami songon pat ni manuk", ninna.

"Unang songon i da, amang!" ninna Si Boru Jongjong Anian mangalusi, "ai apala ibotom do i, indada siporgere-gereonmu, tongka songon i."

Dung songon i, ro ma antong ibotona Si Boru Sopak Panaluan i, ai rohana pe tong do songon roha ni ibotona. Ia dung sombu roha ni nasida na dua, borhat ma ibana na mangguru hadatuon i, tu habinsaran ni mata ni ari, tu Tuan Sumomba Purba Datu Pohom na Bolon, datu tumonggo aji, ibebere ni Tuan di Buhit, na patriop-tiop hurumna, aji na mangusande di hariara sundung di langit, na manggongga bintang sipariama, i ma mula ni desa na ulu; diguruhon ma sian i surat hadatuon. Ia dung diguruhon i mulak ma ibana tu huta ni inana, ai indada tartaonsa be siholna di ibotona i, morningot hajahaton naung somal niulahonnasida.

Ia dung dipamahap rohana, dipasombu lungunna tu ibotona i, borhat ma ibana muse morguru tu hopoltahan ni mata ni bulan, tu porindahan tuba joling, porlompan tuba hoda, porlage-lagehon ardom, mula ni bulan na 12, ari na 30, panggaroda na 8, lamadu na 6, pormamis na 5. Dung diboto i, mulak ma ibana muse pasombu rohana tu ibotona i.

Dung i laho ma ibana muse morguru tu Datu Gumbot na Boion, na sanjongkal do ginjangna, pitu dopa liliton ia bolonna, na mian di dangsina, na samaung-maung matana, na sahinambor ni ma mate ia igungna, na sabolak ni anduri pinggolna; i ma siraja intir-intir, siraja intir-intir di tapongan, na ripe di uli, na so dohot di haorohan, na tinjang nasa sanihe, hundul na saramboan, sibondut ranggas na gaung-gaung, na so olo amporotan. Ia dung diguruhon ibana hadatuon sian i, mulak ma ibana muse pasombu siholna tu ibotona i.

Dung i laho ma ibana muse morguru tu porhotang sibintang morjombut, porbunga-bunga na satutup ni odap, gantang panu-

luhan, hatian pandosdosi, sitotari na rundut, siangkat na polin. Ia dung diboto hadatuon sian i laho ma ibana mulak pasombu siholna tu ibotona i.

Ia dung sai songon i pangalahona dohot ibotona, didok Si Boru Jongjong Anian ma tu anakna i, "Ua mangoli ma damang, ale Aji Donda Hatahutan, ai nunga tuk porbinotoanmu!" ninna.

"Molo songon i, ale inang, jou ma jolo ibotongki, asa jolo hupasombu siholhu, dung pe i asa borhat ahu", ninna mangalusi hata ni inana i.

Alai nang pe sai dipaingot inana i ibana, na so jadi bahenonna na so uhum tu ibotona, indada dioloi, ai dos do rohana dohot ibotona i.

Dung i didok inana i ma muse tu ibana: "Laho ma damang mangaririt, 3 manang 8 halak pe oli damang, indang mahua i, ai so sinamot na hurang di hita", ninna.

Borhat ma ibana antong mangaririt, jumpangsa ma si Boru Pinatinjang, di pantangan andang-andang, di pantangan undung-undung, di tarisopo portonunan, boru ni Datu Rondang Sabungan, di hapoltahan ni mata ni bulan, morundang-undang ma nasida; didok ma mandok Si Aji Donda Hatahutan, "Molo na tutu ma ho Si Aji Donda Hatahutan, di dia ma diboto ho huta ni sibarbar losung, huta ni sibau anduri, sibolongkon na niomona, sigadis anakna, silului na soada, sibolongkon na adong; ia soada, dilului, ia dung adong, diambolongkon?" ninna.

Dung i didok Si Aji Donda Hatahutan ma mangalusi, "Molo songon i, ale boru ni raja bolon! Dia ma adong diboto ho: sanjompot do uluna, saasta do babana, na hurangan di bibir, na lobian di bibir; margondang Ompun Tolu, suda painondurna diallangi." Alai indang biboto boru-boru i lapatan ni na nidokna i.

Dung i mulak ma ibana tu hutanasida, didok ma tu inana, "Na uli do nian rupa ni na huririt i, alai inda tung adong tarpasuman ianggo tung tu rupa ni ibotongkon", ninna, ai sai holan dampak ibotona i do rohana, sai i do dipaingot-ingot nang di na mangaririt i ibana. Dung i dirambus inana i ma obukna, ditompuk lambiakna, huhut ma didok, "Sapot ni nipingki, soro ni aringkon, tubu ma hape jea bolon bahenon ni anakkon!" ninna.

Ia dung sombu roha ni Si Aji Donda Hatahutan tu ibotona i, borhat ma ibana muse mangaririt, gabe jumpangsa ma Si Boru Haen Humiap, pitu di pudina, ulu di jolona, na sinondang ni bohina, lehet bahenonna. Alai dengen pe panailina, indang tudos ianggo pangembalna; tudos pe pangembalna, inda tung tudos porsimangarudokna ianggo tung tu rupa dohot pordagingon ni ibotona Si Boru Sopak Panaluan, na sinonom ni rohana i tongtong. Dung i mulak ma ibana, didok ma tu inana i, "Beha ma i, ale inang? Ia jumpang ahu na dengen pangembalna, indang tohu tu rohangku ianggo porsimangarudokna, ai tung sai daul do sian rupa ni ibotongku Si Boru Sopak Panaluan i. Beha ma i, inang, sai dampak ibotongki do rohangku tongtong", ninna.

Dung i marsak ma natorasna i duansa mornida pangalaho ni anak dohot borunasida i. Dibahen nasida ma Si Boru Sopak Panaluan tu huta ni tulangna Portigatiga Torus, unang sai dipaidaida ibotona baa.

Alai dung so diida Si Aji Donda Hatahutan be ibotona i, didok ma mandok inana i, "Nunga tu dia ibotongki, ale inang?" ninna. "Laho dope tu balian", ninna inana i mangalusi.

"Boasa ma paoto-otoonmu ahu, ale inang, ai huboto do manang tu dia ibotongki dipalumehon ho. Naung dipaguruhon ho do ahu, ale inang; dirimpu ho, ma na so huguruhon dohot poralomat? Ida ma ale inang: hundul pe ahu di son, boi do jouonku ibotongki sian huta ni datulang", ninna.

Dung i dipasang ma ula-ulana i, ditabashon ma tabas ni dorma, didok ma songon on, "Baungku, na bau albang, na bau pandan sairi, na bau bane siholing, na bau garang-garang ni lautan. Ale alogo situmalatap, tu alago situmulutup, alogo situmonding, na habang sahat tu ibotongku, sai hiaphon ma ate-atena, beta-beta ma rohana, hida-hida ma ibana, asa moringkat ro tu jolongku!" ninna.

Dung dipasang ula-ulana i antong, indang pola sadia lelung, ro ma ibotona i. Dung i mengkel ma ibana mandok tu inana i, "Beha do, ale inang, inda nunga ro ibotongki?!" ninna.

"Inang da ba, inang, mataut hupaguruhon ma anakki! Sapot ni nippingki, soro ni aringkon!" ninna roha ni inana.

Dung sahat ro Si Boru Sopak-Panaluan, hinida-hida ni dorma ni ibotona, mengkel be ma nasida, dipasombu ma lungunna, dipamahap ma rahana. Morpadan ma nasida, songon on, "Na so tupa do ahu mangoli, ale ito, ianggo so jolo muli dope ho", ninna si Aji - Donda Hatahutan tu ibotona i. "Ba, ahu pe, ale ito, tung na so muli do ahu, anggo so jolo mangoli dope ho", ninna Si Boru Sopak Pnaluan mangalusi hata ni ibotona i.

Ia lelung ma di porlelengan, lalap ma di porlalapan, dung sai songon i roa ni pangalahonasida na moritboto i, borhat ma Si Aji Donda Hatahutan tu harangan na lungunan, tu tombak na, ngolngolan, tu hau piut-piut tanggule, manjangkit ma ibana tu ginjang, gabe diihuthon ibotona ma tu si pasombu sihol ni dagingna, hape lohot ma nasida dipulut gota ni hau piut-piut tanggule i, laos so boi be mijur; ia dung songon i manganguhi ma nasida. Alai adong ma halak na umbege i, gabe diida ma nasida di atas ni hau i; jadi laho ma nasida paboahon tu amana Guru Satia Bulan dohot tu inana Si Boru Jongjong Anian.

Dung sahat tu nasida barita i, humalaput ma nasida laho mornida, dibereng ma tutu, nunga lohot nasida di ginjang ni hau i.

Masipansorohon hatana ma na torop, didok be ma, "Naso uhum do on; indang hea hamamago ni halak songon on; ibotona donganna sarurut do i, so na dangka tutur, tung barani mambahen songon i! Patut do antong songon i", angka ninna be. Adong ma jolma i na mengkel, adong na mamursik, dung diida nasida naung lohot di hau i.

Dung i morpingkir ma natorasnasida i dohot angka jolma na di sini, didokkon ma na manjou Boru Sibaso Paet, anggiat boi tanggalan ni hadatuonna nasida sian hau i.

Alai dung ro Boru Sibaso Paet i, dipasingkop ma ambu ambuan, dipangke ma nasa boto-botoanna; dung i ninna ma, "Pola ma dia maol ni i longkanganku?! Dohot na sai mura!" Dung i manjangkit ma ibana tu ginjang ni hau i laho managgali Si Aji Donda Hatahutan dohot ibotona i nian, hape laos dohot ma ibana lohot di si.

Dung i dialapi muse ma Guru so Adangon; dipalolo i muse ambuambuan, dipasang nasa boto-botoanna; manaek ma ibana

tu ginjang ni hau i mananggali naung lohot i di si, hape laos dohot ma ibana lohot muse.

Dialapi muse Sipatundal ni begu, dipangke i nasa boto-botoanna, dung i manaek ma ibana tu hau i laos dohot ibana lohot.

Ditogu ma muse horbo sisapang na ualu, asa ugeanna bona ni hau i, anggiat marumpak, hape laos dohot ma i lohot tu hau i.

Dijou muse dohot ulok mahin-mahinan, hape laos dohot do i lohot.

Diarahon muse dohot asu sangsing, asa haharatanna hau i, hape, nang i, laos dohot do lohot tu si.

Asa ia dung lohot sude na manjangkit tu ginjang i, laos so boi mijur dibahen pamulut ni gota ni hau piutpiut tanggule i, laos gabe hau ma nasida sude di si.

Ianggo Guru Satia Bulan dohot jolmana Si Boru Jongjong Anian Si Boru Tibal tudosan, hau jadi jadian, jolma na so martudosan, nunga tung mansai marsak rohanasida, malampot ateatena pasarisari ianakkonnasida naung gabe hau i. Digagalmiti nasida ma hurumna, digogotili lambiakna; angkadekdek ma ilunasida ditangkupi hambirangna; indang laho be sipanganon dipangan nasida, mansai morniang ma nang dagingnasida.

Ia dung sai songon i, laos so sonang do rohanasida, gabe dialapi ma Datu Tala di Babana. Dipalolo i ma antong hasea na pitu, dipatungkap ma amfang, mangulpuk ma ibana, didok ma, "Ingkon tabaon do hau on, asa ganaonku!" ninna.

Dung i ditaba ma hau i, alai indadong olo bil; angkatolpang tangke, angkaropang jarbang, angkaleu dohot baliung, matua so olo do maluhit hau i dibahen.

Dung i sian na so panagaman, mangkuling ma Si Boru Sopak Panaluqan, na lohot di hau i, didok ma, "Molo naeng marumpak hami bahenonmuna, ingkon jolo bahenonmuna do peleanku, i ma: ihan na niura, tuak tangkasan dohot sirapege." Alai dibahen nasida pe songon na ni dokna i, tong do so olo bil hau i ditaba.

Dung i mangandungi ma Si Boru Sopak Panaluqan, laos didok ma tu datu i, "Hansitna i, ale amang, na hutaonhami on! Tu ho do ahu, ale amang datu, morbilang-bilang; tu ho do ahu morsapata arian morsapata borngin, ai ala ni bahen-bahenanmu do umbahen songon on hansitna hutaon."

Dung i dialusi datu i ma hatana i, didok ma, "Paliasi, ale Boru Sopak Panaluan, ai luhutna do halak masiulahon ula-ulana dohot na binotona. Alai luhutna i, tu datu panggorga, tu datu panggana ma ho marsapata, tu si ma ho morbilang-bilang, indada tu ahu, ai ibana do sibahen na hansit portinaonnanmu."

Dung i didok Si Boru Sopak Panaluan ma tu datu panggorga i, "Sai morsapata arian do ahu tu ho, morsapata borngin, ai bahenbahenanmu do hape, umbahen na songon on mago ahu."

Alai didok datu panggorga i ma mangalusi: "Indada tu ahu i dohonomu, tu panopa i ma sudolhon; aik unang ula-ula angka na tinopaanna i, indang mahua songon i taononmu."

Dung i didok Si Boru Sopak Panaluan ma tu panopa i, "Sai ombushon ma i, ale alogo simorangin-angin, ai panopa i do hape mambahen ahu songon on!"

Alai didok panopa i ma alusna, "Tu pangumbak i ma i dok, indada tu ahu; aik unang na diumbak ibana, indada manjadi ula-ula i topaonku".

Dung i didok Si Boru Sopak Panaluan ma tu pangumbak i, "Ho, ale pangumbak! Sai morsapata arian do ahu tu ho, morbilang-bilang borngin, ai porulanmu ma hape, sibahen ahu tu hamagoan."

Didok pangumbak i mangalusi: "Tu arang i ma i dok, indada tu ahu; aik unang na olo i galak umbahonku, indada morhua saut bosu i gabe ula-ula."

Dung i didok Si Boru Sopak Panaluan tu arang i; "Ho do hape, ale arang, sibahen ahu songon on! Asa tu ho do ahu morsapata."

Alai didok arang i ma alusna, "Palias ma hatami, tu api i ma dok, ibana do sibahen i."

Dung i didok Si Boru Sopak Panaluan ma tu api i, "Tu ho do ahu hape morbilang-bilang, ale api, ai pambahenmu do hape, umbahen mago ahu."

"Indang tu ahu i dohononmu, tu loting do, ai ibana do manjadihon ahu umbahen na adong; tu ibana ma ho morbilang-bilang", ninna api i mangalusi.

"Ho do hape, ale loting, sibahen hamamagongkon; asa tu ho ma ahu morsapata", ninna Si Boru Sopak Panaluan tu loting i.

Dung i didok loting i ma mangalusi, "Indada tu ahu i dohononmu, tu panopa do, ai ibana do manopa ahu umbahen na adong."

Didok Si Boru Sopak Panaluan muse hatana tu panopa i. Dipabali panopa i muse tu panggorga. Sai songon i ma nasida masipabali-balian, laho pasidingkon sapata ni Si Boru Sopak Panaluan.

Dung i mangkuling ma muse Si Boru Sopak Panaluan i, didok ma hatana tu amana Guru Satia Bulan, "Nunga songon on portinaonanku dibahen ho, ale amang, hahuaon! Alai anggo on, siingotonmu: Sai bahen ma ahu tungkotmu di ari porudan, di dalam na landit, sulu sulum di ari golap. Antarhon ma ahu di pogu ni alaman uju mamele sumangot ni ompu, songon i nang uju laho borhat mormusu, nang di na laho mangalului ugasan mogo; pagohon ahu di pogu ni alaman di hamamasa ni haba-haba, asa menak alogo, so halisungsung. Ia dioloi ho na hudok i, horas ma ho, paida-idaon ni halak ma ahu huhut. Songon i ma bahen nang di angka siulaon na asing pe, ro di na mamele pangulubalang, asa targoar ahu huhut tungkot ni pangulubalang. Dung i ingkon tortorhononmu do ahu di pogu ni alaman, asa gabe ho. Asa i ma pusaha di ho, sipeoponmu." Dung i dioloi Guru Satia Bulan ma pangidoan ni boruna i, Si Boru Sopak Panaluan, iboto ni Si Aji Donda Hatahutan, na marporhas tubu, sibahen haurahon di natorasna. Asa molo adong na morporhas tubu, sada baoa sada boru-boru sahali manubuhon dibahen inana, ingkon jamot do natorasna mangaramoti i, unang tubu haurahon di nasida na dua, songon Si Aji Donda Hatahutan, na morroha mago tu ibotona gabe lohoh nasida di hau piut-piut tanggule, i ma hau tada tada. Ingkon jaga do natoras ni dakdanak na morporhas tubu i manjaga anakonna i unang tubu hasusaan dohot hailaon; ingkon pulik panaguhan do i bahenonna, pulik pormemean, pulik pormeaman dohot pulik podoman.

Ia dung sun didok Si Boru Sopak Panaluan tonana i tu amana Guru Satia Bulan, bot ma ari, gabe mulak ma nasida dohot angka donganna tu huta. Dung i morsogotna i, ro ma haba-haba siampalautus, halisungsung morpiu-piu, dibutbut ma hau piut-piut tanggule i, halohotan nasida i. ro di angka dongannasida na lohoh

tu si, diboan alogo i ma i laos dipeakkon tu alaman ni Guru Satia Bulan. Dung i ro ma datu panggana, datu panggorga, dibolai ma hau i, digana ma i tudos tu rupa ni sude na mate di hau i, dung i dipambagihon ma hau na ginana i ris morompu-ompu.

Asa i ma mula ni tunggal panaluan, na pinamasa ni angka datu Batak di lan ulaon ni halak sipelebegu. Gana porginjang i ma suman-suman ni Si Aji Donda Hatahutan angka na di toruna i ma suman-suman ni sude datu na naeng paluahon nasida, na laos lohoh tu si dohot nasa na manaek tu si. Ia pauli tunggal panaluan datu, ingkon hau piutpiut tanggule do bahenona i ma hau tada-tada. Tunggal panaluan i ma ninna situlak aji ni halak, sitampar aji ni begu. Songon on ma dibahen pangulahonna di deba ulaon ni sipelebegu.

1. Uju mamantom horbo, laho mamele simangot ni ompu. Molo tole halak morhobas laho mamele simangot ni ompu, ingkon rim ma na sabius i manggugu hepeng pasihorbo pelean sitonggohonon ni datu tu simangot ni ompunasida, laho, mangido pangabean, porhorasan, hasangapon, gabe ni na niula, sinur ni na pinahan. Paluonna ma di si gondang laho mangelek-elek simangot ni ompunasida i, asa siar tu hasandaranna, asa pasahatonnasida peleanna i. Sipata antong pitu gondang dipalu jala ditortori angka na torop morsorin-sorin, i pe asa olo siar porsimangotan i.

Ia naeng datu i manortor, dipeakkon ma bindu matoga di alaman i, ditiop ma tunggal panaluan i, ditali-talii ma i denggan. Dung hobas datu i, dipangido ma paluon gondang tu sijama porhinaloan i, ia dung mangkuling gondang i, ditortorhon datu i ma tunggal panaluan i huhut ma dihaliang-kaliangi horbo naung binorothon di tonga-tonga ni na torop i, pitu hali dihaliangi.

Ia dung sidung manortor angka panortor, sidung nang datu i, tole ma na mamantom horbo i. Ia dung dipantom horbo i, so haru peak dope, masionjaran ma na torop i di si asa unang dompak nasida marobo horbo i, alai asa dompak donganna. Tardok do dua bagian na mangadopi horbo i, pulik be morsasaompu. Ia dompak na saompu marobo i dung dipantom, i ma na talu. I ma umbahen na ma gasa gogo be nasida mangonjar horbo i, asa runggang dompak alona.

Ia dung saut marobo horboi, dilapa ma. Dipapulik ma anggo juhutna i, dipormasak ma i panganon ni na torop; dipapulik ma angka na morgoarna, i ma sipelehononna tu porsimangotan sipeleonnasida i.

Dung i mortonggo ma datu jinounasida i, songon on ma didok, "Simangot ni ompunami, simangot ni ompudoli, simangot ni ompuboru, ompu porsadaan, paisada, paidua, paitolu, paipat, pailima, paionom paipitu na umpompar hami on. Pitu sundut haoloan, haturutan; sigostong di portibi, angka na gabe porsimangotan, debata jujungan ro di sihomban ni uma, pangulubalang suan-suanan, homban sitio-tio ro di angka simangot ni ompu bao! Toga, manumpak hamu di pudi, mangambili hamu di jolo!"

"Ahu na tumonggo debata dohot sombaon, di son do santi madingin santi matogu, pangidoan sangap pangidoan badia, di son do dohot pelean, horbo sitingko tanduk. Ba, nunga ho ompung porsimangotan, badia muse daompung boraspati ni tano, tano hinaojahan, tano hinaondolan, dohot daompung bauta ni huta, na tumitipi tungko-tungko, na rumotap dalan, na mangungkit bungki, na mangkunti galogat, na jumadihon balikkuhu, na jumolo mangiup api, na humaliang na humaloho, na liat-liat portibi. Di son do santi mandingin, di son do santi matogu, sitompion na godang, itak gurgur, juhut pinadar, dengke niura, manuk lahibini, babi lumok-lumok, pangidoan sangap, pangidoan badia; porsangapi hami, porbadiai, pagabe hami, pahoras, hami pomparanmon; pagabe na niula, pasinur nang na pinahan. Hami na mortonggo debata dohot porsimangotan, na mortonggo huasi! Somba ujung, somba huasi!"

II. Uju laho borhat mormusu. Morpungu ma sude na sada hasuhuton i di alaman, diboan ma tu si sada manuk, i ma sigantungan i. Diboan datu ma tu si tunggal panaluan, dililiti ma i sian ginjang torus tu toru, tigabolit dibahen lili-litna. Dung i disulangi ginjang torus tu toru, tigabolit dibahen lili-lilitna. Dung i disulangi ma tunggal panaluan i, dibahen ma sirapege, tuak tangkasan dohot pinadar sulang sulangna. Ia dung sidung i, dipagohon datu i ma di jolona.

Dung i ditiop datu i ma manuk i, ditonggohon ma songon on jolo ni na torop i, "Turun ma hamu debata di atas, manaek

manjung ma hamu debata di toru, hundul mangunsimpu ma hamu debata di tonga on. Turun ma hamu na guru songta, na guru songti, asa songta, songti ahu, na moruhum, na morsantabi, di daompung boraspati ni tano, daompung Mulajadi na Bolon. Tinongosmu do hami tu toding banua tonga on, asa dapotan pangomoan hami sian harajaon. Tinongosmu do hami sahala poruma, asa dapotan uli hami sian porumaon. Tinongosmu do hami sahala na begu, asa dapotan porulian hami sian habeguon. Tinongosmu do hami sahala datu, asa dapotan pangomoan hami sian hadatuon”.

”Lidang do ahu, inang boru jau, inang boru Toba. Aha do margamu, inang na sada huta on? Ianggo marganami tahe inang, Tambaujung saribu, sisataon hami di bortian, sataon hami tundun api, laos so ditanda do hami boru-boru, laos so diboto do hami manang lahi-lahi.”

”Dia ma tahe inang, jaha-jaha ni pormanuhonmuna i? Siaji Nangkapiring, Nai Guru Sinomba, na sinomba ni aji, na sinomba ni poda, laba-laba ni ompunta Tuan Batara Guru Doli. Na morlahi-lahihon ompunta, manuk silali piuan, silali manoro, sianting-tanting ni manuk sabungan, na so dung talu, na matua monang, ninna gurunta Si Naboru Pandan, na taripar di lautan on.”

”Asa ung ma di horja hullo, horja hulongko uas sombayanku, hae hati, hae hatan. Asa na pininta sian manuk gantungta on: Ingkon hot batu ni ruma, jojak batu ni sopo, ingkon gompang uluna, morbabiati ibana, unang ro uiu mangunduk, unang ro munsung mangubit. Songon na hurang denggan do ale manuk gantungta i. Pasak porgumbangan, unang adong hita laho mormusu. Unang momar matana, asa unang maporus paranganta i. Sai unang manindang imbuluna, asa unang mabiar paranganta i. Ingkon manindi debata panaluan, ingkon manggomak sigurampang bosi, manusur Batara Guru, mangalompas boru Saniangnaga, ingkon mangananggar siboru na riburon, manulluk jala mangkait.”

”Asa tindang ma ompunta imbulu babiat, na songon urur pinatording, songon rogon ni bulu, songon sait ni dari, paboa na uli, paboa na jagar!”

Dung i diseat ma manuk i, morpanamboli do dibahen, ditiop datu i ma di uluna, digantung ma di tanganna, dung tompu ma i

muse dipeakkon. Dung i dialathon datu i ma, manang dia do boa-boa ni manuk i, ai tarida do i ninna sian panggompang ni patna, sian p̄rhehe ni imbuluŋa dohot sian pangalahona na asing dung diseat manuk i.

Morhite sian i ma diboto datu hataluan manang hamonangan na ro, ia saut mormusu. Ia leak hataluan do, ba indang be saut nasida borhat, dijujur nasida ma jolo ari na denggan, porlangkaon na uli, asa na ripe monang moralohon musuna.

III. Uju di ugasan mago. Dipangke halak do tunggal panaluan i bahen gana panolonan ni na tinuhas ni roha, ia jumpa adong ugasan mago. Songon on ma dibahen. Diboan, ma i tu alaman, diloloi dongan sahuta. Disulangi ma i jolo, dibahen ma sulang-sulangna: sirapege, tuak tangkasan, juhut pinadar manang dengke niura. Dung i didok ma tonana sioloan ni panolom i, i ma na tartuhas sitangko ugasan na mago i. Didok muse ma hatana tu tunggal panaluan i songon on, "Ompung tunggal panaluan, Aji Donda Hatahutan, Si Boru Sopak Panaluan, horbo paung, sibaso bolon, datu pormanuk, ulok mahin-mahinan! Dibahen na binohan hamu tu alaman na mago do ugasanku i ma

"Ba nunga dijalo hamu sirapege, sai tibu, ma tarbege pangonaim di sitangko ugasanki. Pinainum hamu dohot tuak tangkasan, ba, sai tangkas ma ho maminsang, mangarobur di sitangko ugasanki. Na manunggul ma ahu di gogom, na morngoti ma ohu di saudaram."

"Habang ma anduhur,
Songgop tu purba holing,
Anggo sitangko ugasanku,
Unang be dieak tonga barngin",

ninna na agoan ugasan i.

Dung i so ma na pinatolonna i, dijama ma tunggal panaluan i, diapus ma i sian ginjang tu toru, didok ma huhut, "Ba sai songon na nidokmi ma tutu, molo ahu manangko ugasanmu na mago i: Alai anggo so ahu do mambuat, sai manumpak manggabei ma tunggal panaluan on di ahu", ninna.

Ia tongon na pinatolon i manangko, ugasan i, ba, ingkon adong ma aeonna, sahit manang mate: Alai anggo lias do ibana, so tutu adong dibuat, horas do ibana, so adong agia na mado. Songon i ma pangulahonna ditunggal panaluan, ia adong ugasan mago, gana panolonan ma i dibahen.

IV. Uju ro haba-haba. Molo ro alogo na gogo, haba-haba siampalautus, halisungsung morpiu-piu, dipaijur halak ma tunggal panaluan i sian jabu, dipantikkon ma i di pogu ri alaman, dipadompak ma i tongon tu bona ni haba-haba i, asa motap, asa so. Indada pola dibatasi i manang ditonggohon, holan songon on do didok na manonggohon i, "Tulak ale ompung, pasonang alogo ombak, alogo laut, naga sipitu tanduk, sssst! diam! diam! diam!" Ia dung dibahen i, ninna, menak ma alogo na gogo i, so habiaran be tu jabu manang sopo, so segaanna be nang suan-suanan.

Mansai godang do tabas ni tunggal panaluan i, ai na morasing-asing do i huhut hombar tu na tinembak ni na mangulahonsa. Asa on ma saragam tabasna, naung jojot tinabashon ni angka datu.

"Asa turun ma hamu, ompung debata di atas; manaek manjujung ma hamu, ompung debata di toru; hundul mangunsimpu ma hamu, ompung debata di tonga. Satonga turun ma hamu, ale inang, na guru songta, na guru songti, asa songta, songti ma hamu ompung, na sumunggul saudara ni ompunta, tunggal panaluan, Si Aji Donda Hatahutan, siupar mangalele, datu na sungkot di langit, datu ponjot di tano; Si Boru Sopak Panaluan, Datu Gumbot na Bolon, horbo paung! Asa pasiarhon ma ibana, di toru ni saniangnaga langit, di atas ni saniangnaga langit, di atas ni tano, tano dangdang, tano dungdung, tano haojahan tano pulo pandan, tano ringgahora, tano ringgahoru, tano liat-liatan, tano gurtur-guntur na ridom, tano gumba lalaen, tano jadi-jadian, tano tumpantumpunan, tano tongosan ni ompunta Tuan Batara Guru Doli, tinompa ni ompunta Si Boru Deak Parujar na sungkot di langit, sideak uti-utian, sideak ujar-ujaran, na manompa tano on. Asa na manunggul ma ahu di gogona, morngoti ahu di saudarana, saudara ni ompunta, tunggal panaluan, asa dipasiarhon ma ibana, na morpangu ubalangkong horbo paung, na morpangulubalangkong

Datu Gumbot na Bolon, na morpangulubalangkon Guru Tinandangan, na morpangulubalangkon datu pormanuk holing. On pe ale, Ompu Ledang na bolon, Sinambela morhahap, ringkabor sibolang, sidari manarus, sidari mangambat na morpangulubalangkon ulok mahin-mahinan, aji porburu-buru sidari manoro, bosi tumbur-tumbur jati, sai pasiarhon ma ibana ompung, moregas-egas."

"Ia pangonaim ale ompung, debata di tonga, pultak di tonga-tonga hosa ni musunta i, unang dapot rompuon, unang morusap, unang mormum. Molo morusap, molo mormum, tangkup ma utokutokna, sopsop ma daromatana, porsurage ma holi-holina, porpinangtunggal ma pusu-pusuna, porsiathon ma laho tu jabu, porsidomdomhon ma laho tu toru! Asa ngot ma ho, ale hala dari, ngot ma ho, ale hala manoro, soro ma hosa ni musunta i, suda soada! Sah!"

Dipangke datu do tunggal panaluan i manullang pira ni manuk na beuhan, manang na halohotan, bahen tondung tu pormusuan, asa binoto hataluan manang hamonangan. Alai ingkon manolupi do ganup jolma di ulaon sisongon i, asa tung bosur situtu.

On ma jaha-jaha ni tunggal panaluani didok datu disi,

1. "Jaha pira ni manuk, pandumpangon na bolon, siaji boru anggasana, na mangulak aji ni halak, na mangulak aji ni begu, na mambahen pagar pararot, pagar pormahan di na pinagaranta on."

2. "Jaha pira ni manuk mangihut tu tunggal panaluan, molo disintak tu ginjang, bungkas ma huta ni musunta inon."

PANGULUBALANG.

Ala morgoar do huhut tunggal panaluan i tungkot ni pangulubalang, laos pinajojo ma di son na dapot paboaoon taringot tu pangulubalang i; jolma dodu itumpa, songon on pangalahona didok barita: Adong ma halak saompu, naeng manumpa pangulubalang, asa adong i pasuru-suruonna laho mangalengsehon musuna, laho papidomhon na hinasogohon ni rohana. Dung i didok na sada sian na saompu i ma, "Boti ma i, ale angka dongan! Adong do sada

halak sian luat na dao ro nuaeng tu luatta on, siporsibong lasiak na malamun. Ua ibana ma tuela-ela, asa dapot tumpaonta bahen pangulubalangta?!" ninna. Dung i ro ma angka dongonna i, ditolopi ma hatana i.

Dung i disungkun nasida ma baoa na ro i, didok ma, "Halak sian dia do hamu, ale rajanami? Apala aha do na niulamuna ro tu luatnami on?"

"Halak sian na dao do ahu, na ro manandangkon hadatuon dohot tumandangi hadatuon", ninna baoa i mangalusi.

Ia dung songon i hata ni baoa i dibege nasida, dipatolhas ma i tu datu dohot tu rajanasida, asa sahata, satahi nasida padapothon baoa i, asa saut tumpaonna gabe pangulubalang. Ia dung dos tahinasida, datu i ma dibahen nasida mangela-ela baoa na ro i, sitandangkon hadatuon, na tumandangi hadatuon i, siporsibong lasiak, mangigil rasun ni deba.

Dung i ro ma datu angka na mangonggop ibana i didok ma, "Ale rajanami! Rupa na manandangkon hadatuon do hamu, tumandangkon hadatuon. Anggo i do na niulamu, beta ma tu hutanami!" Dung i udur ma nasida tu huta, dung sahat dipahembang ma amak hundulanna di jolo ni sopo, di si ma nasida jolo hundul mangkata-hatai.

Andorang di na mangkata-hatai i nasida, nunga disuru datu na di luat i hian mangalap tuak. Ia dung ro na mamboan tuak i, didok ma tu na ro i, "Minum ma antong na ro i. Hape naung dibahen datu nidapotna i do dorma tu tuak i.

Ia dung masak sipanganon, diarahon datu i ma na ro i mangan, didokma, "Nangkok ma hamu tu jabu asa mangan hita!" Dung i hehe ma na ro i, hape lohot do amak hinundulanna i di omba-ombana; manang beha pe dibahen pahusor-husorhon, inadada olo tanggal.

Dung i ro ma datu ni huta i, diulahi ma manjou, didok ma, "Ba, pahatop hamu, ale rajanami, ai nunga rade panganan", ninna huhut didapothon tu jolo ni sopo i.

Alai dung diida datu i, naung sai lohot hape amak i di omba-omba ni na ro i, didok ma, "Bosa tiopanmu antong, amak, tamu-enami i? Palua, asa mangan hami!" ninna, laos dipiltik amak i, gabe longkang ma tutu.

Ia dung ro di jabu nasida, dilehon ma jomuhan, didok ma, "Morjomuk ma hamu!" Hape dung dibahen na ro i tanganna tu porjomuhan i, indang boi be enettonna, sai toltol nama di si.

Dung diida datu ni huta inon i, didok ma, "Palua antong, jomuhan, tangan ni raja i, asa mangan hami!" Dung pe i asa boi enettonna, laos mangan ma nasida.

Ia dung sun nasida mangan, tole ma nasida mangkata-hatai. Disungkun datu ni huta i ma ibana songon on, "Ai na laho tu dia do hamu, rajanami apala aha do na niulamuna?"

"Na tumandangi hadatuon do ahu nian, manandangkon hadatuon", ninna na ro i. So diboto na maila atik pe nunga talu ibana dibahen guna-gunaan ni na nidapotna, tarila ibana dibahen amak dohat porjomuhan.

Dung songon i alusna, didok na manamuei ibana i ma, "Anggo i do hape na niulam, ale rajanami, tu huta adui ma ho laho, ai di si do adong datu, indang adong anggo di hami on", ninna.

Hape, nunga adong hian ula-ulaanna disaorhon tu sipanganon i dipangan baoa na ro i.

Ia dung mijur be nasida sian jabu, laho ma baoa i manuruk bara ni horbo, hundul-hundul ma ibana di napa ni horbo i manipat sadarina i.

Ia dung moreak bot ari, muli be ma pangisi ni huta i sian ulaonna, mulak ma nang datunasida i sian pordalananna, gabe diida ma baoa na ro i, sai hundul di bara ni horbo, gabe didok ma, "Boasa ma tu napa ni horbo i ho juguk, ale rajanami?"

"Hahuaon!" ninna baoa i mangalusi.

Dung i didok datu ni huta i ma, "Boasa tiopanmu antong, napa ni horbo tamuenami i? Palua!" ninna. Dung i ruar ma baoa i sian i tu alaman.

Morhite sian angka i, diboto datu ni huta i ma, na maila so datu do baoa na ro i, hinajugulna do mandok na tumandangkon hadatuon ibana. Lam digogo datu i ma antong mamasang angka boto-botoanna, maniop-niopi langka ni baoa i, unang diboto morot manang tu dia, asa saut i muse tumpaonnasida bahen pangulubalang.

Ia dung lelung baoa i didorma-dormai nasida, tar tabo-tabo nang sipanganon dilehon allangonna, dipasuru-suru ma i huhut

mangalap soban, aek, mangula dohot na asing. Tar disonggak pe i, indang be olo mangalo, indang olo be i manjua nang suruonna, atik pe nian alo sipata tu rohana, sai pintor hata olo nama sian ibana.

"Nunga patu on mangunduk mangoloi di hatangku, indang tu dia be panjuangan ni on," ninna roha ni datu i, dung diida songon i pangalaho ni baoa i, nunga tung jinak situtu, so tutu adong diida hadatuonna.

Dung i mortuptup ma nasida dohot raja ni luatnasida i, ro di angka donganna saompu, na naeng manumpa jolma i manjadihon pangulubalang; di sihabunian ma nasida mortahi, unang diboto na naeng tumpaonna i. Ia dung putus tahinasida, diela ma baoa na ro i, ditogihon ma tu tano mate, ai sai tar tu tano mate do panumpaan ni pangulubalang.

Dung sahat nasida ro di si, dilehon ma tu baoa i nasa sipanganon na pinangido ni rohana, nasa na boi patupaonnasida.

Angka on ma deba sipanganon ni situmpaon i dibahen nasida.

Sangkuk, i ma indahan na tinutu rap dohot juhut dohot lasiak, godang i dibahen.

2. Bortik, i ma poltuk ni eme na nirondang; godang do nang i dibahen.

3. Pinukpuk, i ma dahanon naung sinorbuk.

4. Indahan sinalin, i ma indahan na hinunihan.

5. Pinadar, i ma juhut na nilasiahan, mansai siak dibahen.

6. Pira ni manuk na tata. Songon i do i manangkak dibahen tu pamangan ni situmpaon i, alai jolo dibola, hira pangalambohi di pamanganna, ala naung diborja dihilala pangonai ni na manganhon juhut pinadar i.

Nunga singkop hian angka sipanganon i diboan sian huta, jala indang jadi juaon ni situmpaon i manganhon i sudena.

Dung sun i dipangan, ditonai ma jolma situmpaon i, songon on ma didok: "Ba, nunga dijalo ho sude pinangido ni roham sian ahu, nunga sahat i dipangan ho. Antong, ia tu si ho husuru, tu si ma ho mangoloi!" ninna.

"Olo!" ninna baoa situmpaon i mangalusi.

"Alai ingot: na so jadi paboaonmu goarmu dohot goarhu, da!" ninna na manonai i.

"Olo" ninna situmpaon i.

"Ia hujou goarmu Si Anu, oloanmu do anggo i, da!"

"Olo!" ninna muse.

Dung i dibahen ma goar ni pangulubalangna i: Datu Porhas Sipabungkar Sibabidalu Guru so Suharon. Dipabotohon ma i tu situmpaon i, didok ma, "I ma goar mu, oloi ma i!"

"Olo!" ninna baoa i.

Ala naung singkop didok hata panonaina i, mamatimatii jolma situmpaon i, nunga diunduh, na so jadi manjua be-ibana manang dia pe didokkon sioloanna. Dung i didok ma muse: "Tumpaonnami ma ho bahen pangulubalang; ia tu si ho sinuru, ingkon tu si ma ho mangoloi. Antong, on ma sihatmu, sihat na laga sihat na begu, sihat na so ra talu, sihat na so ra tulak. Pangido ma panganonmu pusu-pusu ni musunami i, ingkon sopsop ma daromatana. Ia dilehon tu ho hirta singkat ni daromata, unang jalo. Ia dilehon tu ho santung ni gaol singkat ni pusu-pusu pina-ngidomi, unang oloi. Ingkon daromata dohot pusu-pusu ni musunami i do jaloonmu", ninna.

"Olo da, rajanami", ninna halak situmpaon i mangoloi, ai so diboto be manjua.

Dung sidung angka na nidok di ginjang i, ditanom ma baoa i sintap ni rungkungna, holan uluna ma puas tu ginjang. Dung i didokkon ma pangangangonna pamanganna dompak ginjang dituangkon ma tu si simbora na nilala, na ginorgoranna di si. Indang tarbahen jolma i be antong morgallo-gallo, holan uluna i ma tarida songon na angkahitir mangkilala mohop ni simbora na nilala i. Ditungkon ma simbora na nilala i muse dohot tu matana asa haru mate.

Ia dung mate na tinumpana i, dihali ma muse. Dung i disahei ma, dipapulik ma sibukna, disaok ma i mambuat miakna, dung i dibahen ma muse itu guri-guri.

Angka holi-holina i pe, dipapungu do, ditutung do i luhut, dung i dibuat ma sude turanggongna i, dibahen ma i tu guri-guri na asing.

I ma pupuk na sumurung jala na ummarga di pangulubalang. Alai di na laho paborhathon pangulubalang i, mordongan

ambu-ambuan ma i dibahen datu, angka na pinulunganna sian angka na tubu di tano, na boi papunguonna.

Songon i ma ninna barita panjadihon ni pangulubalang, na so ra talu, na so ra tulak mangalo musu dohot tahina.

Taida ma muse manang beha pambahenna lahopaborhathon i mangago musuna dohot pamangkena di si di tunggal panaluan.

Ia goar ni pangulubalang i, morasing-asing do i di ganup halak, na mameop pangulubalang, morguru tu goar na pinadanhonna tu jolma na tinumpa i di na laho manumpasa.

Adong ma najolo sada pangulubalang, morgoar Si Ajimamis, sipaborhathon ni nampunasa i laho mangago musuna. Ia pulung-pulungan sipapunguonna deba nari, di na laho paborhathon i, angka on ma: Arang, barerang. imbulu buntal, sait na laga, limut ni sombaon, limut sian inganan ni saniangnaga, silbak-silbak ponoroan ni porhas, sinalit ni gipul, hinarat ni ampodi, tano hiambor ni na mate santongkin, tanggurup batang, ansosoran, ulok na mate manoro, sait ni babiat, sait ni buea, panortoran ni na sigunjaon, poranjahan ni Si Nambela, nasa na rintop na boi jumpang, pusok ni dakdanak nambura tubu, (ia so adong i, pitu gea hapilinna), sada junggulmeong, hubang, halto, hau aek, sitaratulit. Ditutu ma i pungu, lamot ma i dibahen, dung i disaorhon ma tu si miak ni jolma naung tinumpama i, i ma naung pineopna di guriguri i.

Alai indang sae dope holan i patupaonna di na laho paborhathon pangulubalang Si Ajimamis. Digana dope sada anak ni gaol, disihat ma i di bagasan, na di guri-guri i ma dibahen panihatna. Dung i dibuat dope sasolup sagu-sagu, sabale santi-santi, sada panangga, manuk na morlanteung. Paluaonna ma manuk i dompak huta ni musuna.

Dung i ditabasi ma i laho paborhathon pangulubalang Si Ajimamis i, didok ma; "Husombayangkon ma ho, ompung, tu ari na tolu pulu, tu bulan na sampulu dua, tu desa na ualu, tu pormamis na lima. Ai tanda ni ari, na pinanjomurhon; tanda ni bulan, na pinambauhon. Tanda ni ompunta Si Ajimamis, na morompuhon desa na ualu, na morinahon bulan na sampulu dua, na moranakkon ari na tolu pulu, na morpahompuhon pormamis na lima. Asa unang ma hamu inang tumalaban-talaban, tumalebun-talebun,

songon dalu niinjam di pogu ni alaman. Ai anakboru do hamu songon dainang undeng. Ai tarsubut do ahu ningku, laning, di sahala mula jadingku.

Ba, aha ma niombomu, asa hubuangkon, asa hudurukkon, asa hutompashon tu toding tapian ni Si Anu an. Tapian sipor-sunting-sunting, na di mata ni ari, sitartading-tading di mata ni bulan. Asa mortona do ahu di handian, manongos ahu di alogo na mangaban, alogo na mangobin. Asa hupurpurhon ma ho ompung tu tanding sitanalunalu, tu atas liang na binunbun, tu toru ni padang rapuan. Saitan ni ompunta ma i Si Ajimamis, Datu Malim ni aji, Si Ajibisnu, Datu Putor ni aji, Si Ajisari, Datu Jungjung ni aji, Si Ajihala, Datu Tulpak ni aji, Siajiborna, Datu Sibaso bolon.

Asa ung ma ningku, laning, inang anak raja! Oe raja boru, pahompu ni rumbia Nai Morlampu, Si Tarandang na uja, na pande. Inang silandi susu, siganjang mise; inang nanjau, Datu sosor di bale; inang sisiak bagi, sitorop anak, inang sitorop boru; inang nai pangelek-elek, inang nai pangapul-apul, sai elek dainang tondi ni musunami. Inang nai pormuruk-muruk, sai suruk dainang butuha ni Si Anu. Inang siganjang tali, inang simetmet dengke. Inang pangambe na uli, pordalan sigale-gale Sipahu na mira, di ruma ni porsirangan. Moranjak ma i musungki soada musu, siar-siaran soada gondang. Sai topot ma i ompung Si Ajimamis, ganup-ganup banjar, tingkir ganup suhi-suhi. Sai patais ma pangambem, pagogo soaram, patuduhon ma dirim, pataridahon ma rupam, dok ma goarmu. Jou ma morharungguan musungki. Inang na laga manongos, na so ra panongosan; inang na laga mangido, na so ra pangidoan, sai pangido nama jolo tondi ni musu an. Jadihon ma i guntur-gunturon, bahen ma i gaja-gajaon. Sai mangaloting ma hamu di pogu ni alaman, na jumadihon api na morjimbur-jimbur ma hamu ale ompung, pangulima di jau, soripada di Toba, di huta ni musunami an.

Ba morhara ma hamu di orang-orang ni begu, gigilandak na beguon, mombangboru na beguon, tu huta ni musu an.

Inang boru munti, boru munti na harom, sai harom bahen babina i, harom bahen manukna i.

Asa morhara muse ma hamu di begu ni na mate lalaen, asa tubu na masitihaman di huta i. Morhara muse ma hamu di begu

ni na mate mandolos, asa mate masidolosan di huta ni musu i. Arahon muse begu ni na mate sumalin, asa masa na mate sumalin di huta i. Arahon begu ni na mate maningkot, asa masa na mate santongkin di huta i.

Angkat podas dari mata ni ari, angkat podas dari mata ni bulan. Sai ihut-huti, ale Ajimamis, sai tunggu-tunggu, rumpak bulung tobu, mate panumpak, mate panogu, na hona ipu nantae; mate panande, mate na sinande. Na di balik ni dolok saj ihut-ihut; na di bariba ni aek manang tao, sai langei!

Borhat ma ho, ompung, mata ni ari na so ra dua, dohot ho mata ni bulan, na so jadi morimbang. Hau i didege ho, hau i*lagi maponggol; tano pe didege ho, tano i lagi malonglong. Batu pe didege ho, batu i lagi matapor; dolok i didege ho, dolok i lagi matorban; huta ni musungki disuruk ho, lagi i matutung. Di si ma unggas, di si ma andalu; ba gira ma i musungki bungkas, hatop ma i mabalu.

"Ale ni ale, ale ni botohonku, amang sitabunangnang, laengku ma na begu, ibotongku ma ulubalang", ninna.

Alai di na laho paborhathon i, nunga peak hian di si angka ambu-ambuan di atas ni anduri, i ma sagu-sagu, santi-sati dohot na asing. Ingkon rade hian dope di si dohot porhohas ni pangulubalang i, i ma.

1. Porbasbasna, i ma lili tunggal, na nirompu, disolothon sait ni aili dingkan bonana.

2. Rautna, dua kibung, i ma hau andulpak dipauli suman tu raut.

3. Sibudokna, i ma suman-suman ni biang, tolu kibung i digana.

4. Tungkotna, i ma tunggal panaluan. Disulangi ma i dohot sagu-sagu i, dohot pinadar dohot dengke niura. Ingkon ris do sulanganna gombaran na di tunggal panaluan i sian ginjang tu toru, la dung sun i disulangi, ditabashon ma tabas tu tunggal panaluan, songon naung sinurathon i di jolo (Ida alaman 51).

Godang dope angka pangulubalang, sipaborhaton ni na ma-meopsa mangagohon na hinasogohon ni rohana. Sai rap dohot tunggal panaluan i ma i dibahen laho paborhathonsa jala atar songon naung pinaboa di ginjang i ma pangulahonna di si.

Ragam pangulubalang i, ba, ragam do nang pangonaina tu halak na niagona. Ginoaran ma deba di son dohot pangonaina tu na niagona.

1. Pangulubalang Sipubonggare, i ma sipaintop hosa ni halak morsasaompu, asa unang adong, ninna, tinggal nanggo sada.

2. Pangulubalang Nagara di langit, suratna sampulusia, i ma sibuat na mangkuling, sitangko manuk sada, sian huta ni musuna.

3. Pangulubalang Sibatu nanggar, i ma ninna, panegai di sandok pangisi ni huta ni musu, asa tung mate morsingkor, patu-langaon dohot ranggeongon.

4. Pangulubalang Sibatuloting, i ma siantuk na jugul di huta ni musu, sipangaleok, sigarut timpul, siboru porjanjian.

5. Pangulubalang Sigantungrangin, i ma dibahen datu manggantungkon gora, asa unang saut tahi ni musu; i do dibahen manggantungkon utang ni porutang, unang saut ro portunggu, unang saut digarar.

6. Pangulubalang Pangihutihut, i ma dibahen mangalului ugasan mago, molo so adong be na olo morhatohon dohot na pa-boahon, atik pe sai mulak-ulak na uso-uso. Alai dung pe sungkot usu-usu dohot sungkun-sungkun, asa jadi paborhaton pangulubalang pangihut-ihut, asa mangonai i tu sitangko ugasan i.

Ala pangago do pangulubalang ni musu tu iba, ala ni ingkon jagaon do i, tamparon, asa unang mangonai. Ganup halak na moralo i, dibahen be do pangulubalangna, sisuruonna mangago musuna. Alai nang manulak pangulubalang ni musu i, dibahen be do, unang belut tu nasida, i ma pagar. On ma deba goar ni pagar pangulubalang i dibahen datu.

1. Pangulubalang pagar gasing, asa targasing, asa tartutup aji manang pangulubalang ni musuna, ia tung naung dipaborhat dompak nasida.

2. Pangulubalang sitabunangnang, boru Saragi, batu do i digana, di lambung dalihan ma i dibahen; i ma ninna, manulak bahen-bahenan ni musu, ia tung adong dibahen.

3. Pangulubalang sipatulpak; i ma manulpak aji ni begu, aji ni halak. Sitau-tau do ninna, anggo pangulubalang sipatul-

pak i: tau do i pagar, asa unang morgan aji ni musu; alai boi do i huhut bahen pangulubalang panongtongi, mangago huta ni musuna dohot hosa ni sandok alona.

Mansai godang dope ragam ni pangulubalang, suang songon i alona pagar pangulubalang; alai mangulahon angka i, sai ihut do tu si tunggal panaluan dipangke. Sai jolo disulangi do i dohot sulang-sulangna, dung i ditabashon datu ma tabas tu si, hombar tu siulaonna i, mangago musu manang mangkorasi iba dohot dongan.

Asa songon i ma ninna barita, rangsa ni Si Aji Donda Hatahutan, mula ni tunggal panaluan, ale amang panjaha!

B o t i m a



PN BALAI PUSTAKA — JAKARTA



Perpu
Jen